

DAKOTA
WOWAPI WAKAN.
WICOIE WAKAN.

THE
HOLY BIBLE
IN THE
LANGUAGE OF THE DAKOTAS:

TRANSLATED OUT OF
THE ORIGINAL TONGUES;

BY THOMAS S. WILLIAMSON AND STEPHEN R. RIGGS, MISSIONARIES

AMERICAN BIBLE SOCIETY,
INSTITUTED IN THE YEAR 1816,
NEW YORK.

1919

WICOIE WAKAN.

WICOWOYAKE 1.

- 1 Wicoie wakan Israel wicašta yatapi kin, Dawid cinhintku Salomon he tawa.
- 2 Woksape woonspe ko sdonye wicakiye kte, wowiyukcan iapi kin okahnih wicakiye kta,
- 3 Woksape, woonspe, woecetu, woyaco qa wicohan owotanna yuhe wicakiye kta ;
- 4 Tona wacintonśni ksam wicaye kta ; koška kin woksape wowayupike ko wicaqu kta.
- 5 Wicašta ksapa nahon kinhan sanpa ksape kta, qa wicašta wokcan wokonze okahnige kta.
- 6 Heon wicoie wakan kin okahnigapi kta, wicašta ksapa oiepi qa taku okahnigapi tehika eyapi kin koya.
- 7 Jehowa kokipapi kin wosdonye otokahe kin hee, tuka wicašta witkotkopi woksape qa woonspe ihaktapi śni.
- 8 Micinkśi, niyate taku onspe niciye cin nahon wo, qa nihun taku ope niśi kin ehpeye śni wo.
- 9 He wateśdake wašte nipa kin ihdukśan, qa wanapin nitahu kin en un kta.
- 10 Micinkśi, wahtanipisa niyutitan cinpi ešta ihnuhan wicayada kin.
- 11 Ito unyanpi kte, wicašta ktepi kta e nahmana awicunpepi kta, taku śica econpi śni kin hena ituħ wicunhmukapi kte ;
- 12 Woħa en iyohpayapi ocowasin, qa Hades iyecen ni unpi nawicunpcapi kta ;
- 13 Taku wašte ota iyeunyanpi kta, untipi woyuha ojugjudan unhapi kta :
- 14 Hena owasin en ounyapapi kta, mazaska opiye okonwanjidan unhapi kta, eniciyapi kinhan :
- 15 Micinkśi ihnuhan canku kin he en owicayape cin ; oye tawapi kin etanhan nisiha kin ehdaku wo.
- 16 Sihapi kin taku śica oinyankapi, qa wicawe papson inahnipi.

- 17 Taku hupahu ton hiyeye cin owasin wanyakapi icunhan mazahtakiyapi ituḥ onpapi.
- 18 Tuka hena iye we kin hmunkapi, iye nagipi kin on inahmanpi.
- 19 Tona śicaya taku kamnapi, qa tuwe tawa ktepī kin hena owasin tacankupī kin hececa.
- 20 Woksape tankan pan, canku kin ohna hoyeya ece ;
- 21 Otonwe canku ihanke kin ohna, tiyopa icahda mniciyapi ohna ieyanpaha, qa heya,
- 22 Wacintonpi śni tohanyan wicawitkotkoke cin he wašte yadakapi kta, qa waoncesapi tohanyan wowaonce kin he iyonicipipi kta, qa witkotkopika wosdonye śiceyadakapi kta he ?
- 23 Miye ocihanpi heon ihducetupo ; mitaniya kin acicaśtanpi kta, mioie kin okahniḥ ciciyapi kta.
- 24 Hoyeciciyapi tuka ayaktapi śni, minape kin mdumdaya tuka tuwedan en ewacin śni.
- 25 Wahokonkiciyapi kin owasin ehpeyayapi, qa wakta ciyapi kin iyonicipipi śni.
- 26 Miś eya nihnaśkinyanpi kin iciḥapi kta, tohan nina koyakipapi kinhan oncicapi kta.
- 27 Woihangye tohan hiyohi qa koyakipapi kinhan, iyoniciśicapi, wanniomni iyececa wocante śica wicokakije ahna nihiyohipi kinhan :
- 28 Hehan houmakiyapi kta tuka waamdupte kte śni, hanhanna omadepi eśta iyemayanpi kte śni.
- 29 Wosdonye śice dakapi, qa Jehowa kokipapi kin kahnigapi śni.
- 30 Wahokonwicawakiye cin tawatenyapi śni, iyopewicawaye cin owasin wahtedapi śni ;
- 31 Heon ohanyanpi waskuyeca kin hdutapi kta, qa iye wahokonkiciyapi kin he imna kiciyapi kta.
- 32 Oziiçiyapi kin witkotkopi kin ṭe wicaya, qa iyokipiçiyapi kin wacintonpi śni kin ihang wicaya ece.
- 33 Tuka tuwe anamagoptan kin wikope wanin ounye kta, qa taku śica ikope śni owanji un kta ce.

WICOWOYAKE 2.

- 1 Micinkśi, tokin mioie kin iyacu qa wahokonkiciye cin nahmana niciyehnaken ;
- 2 Ninoge kin woksape anagoptan qa nicante kin wookahnige ekta ye yakiyen.

- 3 Han wokcan yakipan, qa wookahnige hoyeyakiye kta ;
- 4 Mazaska iyecen ayakite ça patanyan mazaska wokihnake iyecen oyade cinhan ;
- 5 Hehan Jehowa kokipapi kin oyakahnige kta, qa Wakantanka sdonyapi kin iyeyaye kta.
- 6 Jehowa woksape wicaqu ece, iye i kin etanhan wosdonye wookahnige koya.
- 7 Tona owotanna kin hena wiconi awicakicihnaka ; tona ecetuya ohanyanpi kin Jehowa wahacanka yapi ;
- 8 Hecen wicoope canku kin ope wicakiye ça, tona wašte wicakida hena canku awanwicakiciyaka ece.
- 9 Hehan wicoowotanna, woyaco, wokonze, oye wašte owasin oyakahnige kta ;
- 10 Woksape nicante kin en hiyu kinhan, qa wosdonye ninagi kin iyokipi kinhan ;
- 11 Wacintonpi kin awanniciyake kta, wookahnige niyuhe kta.
- 12 Heon canku síca etanhan enihdaku kta, wicašta pemniyan ie cin etanhan ;
- 13 Hena canku owotanna ehpeyapi, qa otpaza canku kin omanipi ;
- 14 Taku síca econpi kta e iyuşkinpi, pemniyan ohanyanpi kin wowinktayapi ;
- 15 Oye tawapi kin şkoşkopa, qa tacankupi kin pemnimni ece.
- 16 Wihomniwin kin etanhan enihdaku kta, witkowin i skuya etanhan.
- 17 He tokaheya yuze cin ehpekiye ça, taku wakan tawa tawicoun kin akiktonja.
- 18 Tiyohnaka kin wiconte ektakiya atakinyan ya, qa oye tawa kin wanna tapi iyahde.
- 19 Tona en yapi kin hetanhan wanjidan ku şni, qa wiconi canku kin iyahde şni do.
- 20 Hecen wicašta wašte tacankupi kin omayani kta, qa wicašta owotanna tacankupi kin oyape kta.
- 21 Wicašta ecetupi kin hena maka kin otipi kta, wicašta wašte kin hen ounyanpi kta.
- 22 Tuka wicašta síca kin maka kin etanhan wicakawankapi kta, qa tona sícaya ohanyanpi kin hena wicakawihnunipi kta.

WICOWOYAKE 3.

- 1 Micinkşi, mitoope kin ihnuhan ayektonje cin, qa mitawoahope kin

nicante kin ekta yuha wo.

2 He wookiye anpetu hanskaska qa wiconi omaka ota aokijuniciye kta.

3 Ihnuhan wocantkiye qa wowicake aniyuŝtan kin, hena nitahu kin en apahta wo, qa nicantojuha kin akan okiwa wo.

4 Hecen yaksape kta, qa Wakantanka wicaŝta ko cante niciye kta.

5 Nicante ocowasin on Jehowa wacinyan wo, qa nitawacin kin ikpatan ŝni wo ;

6 Canku nitawa kin owasin ohna he kiksuya wo, kinhan nioye kin owasin awanniciyake kta.

7 Ihnuhan ksape niĉida kin, Jehowa kokipeyahan un qa taku ŝice cin etanhan ihduhomni wo.

8 He nicehpi zaniyan niniye kta, qa nihuhu acuniciye kta.

9 Woicahde duhe cin on Jehowa ohoda wo, qa taku icahyaye cin otokapa iyahna :

10 Kinhan tipi womnayaye cin woicewinyan on ojudan kta, qa miniŝa iyuŝkice nitawa kin anapsonpson kta.

11 Cinŝ Jehowa nicapsinpsinte cin he ihnuhan ihayakta ŝni ; qa iyopeniye cinhan wacin iboŝake ŝni wo.

12 Jehowa tona waŝte wicakidake cin hena iyopewicakiya ece, wicaŝta wan cinca iyotan kida kin he iyececa.

13 Wicaŝta kin woksape iyeye cin, qa wicaŝta wookahnige enapeye cin he wopida yuha.

14 He opetonpi kin hee waŝte, mazaska opetonpi kin hee ŝni ce ; hetanhan icage cin hee iyotan, qa mazaskazi kapeya.

15 He inyan tehihika kin he sam iyeya tehika, qa taku iyonicipi iyeye cin owasin hena iyowaja ŝni.

16 He etapa kin ohna anpetu hanskaska, qa catka kin ohna woyuha wowitan iyahna un.

17 Owe tawa kin owe wiciyokipi, qa tacanku kin owasin wookiye ;

18 Tona kaskita yuzapi kin he can wiconi yanpi, qa tuwe he patan kinhan he wopida ya.

19 Jehowa woksape on maka kin ŝinsaya ehnake ĉa, wookahnige kin on mahpiya kin yuŝtan.

20 Tosdonye kin on woŝbe kin naptujapi, qa mahpiya kin cu kin ŝbuya.

21 Micinkŝi, woksape wicake, wowayupike iyahna awanyaka wo. Ihnuhan hena niŝta kin etanhan nunipi kin ;

22 Kinhan hena nitahu en wanapin waŝte kta, qa ninagi wiconi yuhe kta.

23 Hecen okope wanin nitacanku kin ohna mayani kta, qa nisiha kin wanahnaye kte ŝni.

- 24 Makan inonke cinhan takudan koyakipe kte śni, makan inonka eca tanyan niśtinbe kta ece.
- 25 Ihnuhana yuśinye wicaye cin he koyakipe kte śni, qa wicaśta śica wayutakunipiśni wicahiyohi eśta nakun.
- 26 Nakaeś Jehowa wacinyaye kta, qa nisiha icupi kte śni e awanniyake kta ce.
- 27 Tona onśika ninape taku wašte ecawicakicon okihi kinhan ihnuhan teyahinda kin.
- 28 Nitawaśi taku yakiduhe cinhan, Ekta hda qa ake kuwa wo, heyakecinhan ciçu kta, ihnuhan eyakiye cinhan.
- 29 Nitakoda takudan ikopeśniyan nikiyedani ti kinhan takudan śica ecakicon śni wo.
- 30 Wicaśta taku śica ecanicon śni kinhan ihnuhan kici ayakinica kin.
- 31 Wicaśta wakisa kin icekin śni wo, qa ohan tawa kin wanjidan kaħnige śni wo.
- 32 Jehowa tona pemniyan ohanyanpi kin wašte wicada śni, tuka wicaśta ecetupi kin om wohdaka.
- 33 Jehowa wicaśta śica ti kin yaśica, tuka wicaśta owotanna onunye cin hee yawašte.
- 34 Waoncapi en Jehowa waonca, eśta onśiičidapi kin wowašte wicaqu ece.
- 35 Tona ksapapi kin hena wowitan ohiyapi kta, tuka tona witkotkopike cin hena wowištece en ihduwankantupi.

WICOWOYAKE 4.

- 1 Hokśiyopa niyate wahokonniciyapi kin nahonpo, qa wowiyukcan sdonyapi kin cantotpanipo.
- 2 Woonspe wašte ciçupe ce, mitoope kin ihnuhan ehpeyayapi kin.
- 3 Ate cincamayan nahanhin mawankadan, qa miśnana ina icahda waun qehan ;
- 4 Onspemakiya, qa hemakiya ; Mioie kin nicante kin yuhe kte, woahope mitawa kin yuha wo, hecen yani kta ce.
- 5 Woksape kin opeton wo ; wokcan kin opeton wo ; akiktonje śni wo, qa mii kin etanhan mioie kin nakicipe śni wo.
- 6 Ehpeye śni wo, hecen awanniyake kta ; wašte daka wo, hecen nipatan kta.
- 7 Wicoksape kin he iyotan ; wicoksape kin he opeton wo, qa taku mnayaye cin owasin on wowiyukcan kin opeton wo.
- 8 He iyotan yada kinhan yuwankan inicu kta, kaskita duze cinhan hehan

niyuwitan kta.

9 He nipa kin ihdukśan wowiciyokipi yuwitaye kta ; wateśdake okitanin niçu kta.

10 Cinś, anagoptan wo, qa mioie kin icu wo, hecen omaka wiconi nitawa kin niciyuotapi kta.

11 Wicoksape canku kin ociciyaka, canku owotanna kin ohna omaniciciya.

12 Ohna mayani kinhan oihe yaye cin aotinsyapi kte śni, qa yainanka eśta nihicahe kte śni.

13 Woonspe kaskita yuza wo ; ihnuhan aduśtan kin, awanyaka wo heon yani kta ece.

14 Wicaśta ohan śica tacankupi kin ihnuhan ohna idade cin, qa wicaśta pemni kin tacanku kin ohna mayani kte śni.

15 He ehpeya wo, ihnuhan ohna de cinhan, he etanhan ihduhomni qa tokan iyaya wo.

16 Taku śica econpi śni kinhan iśtimapi śni ce : Tuwedan wankaheyapi śni kinhan wicoħba kin wicakipi ece.

17 Wicoħan śica aguyapi kin he yutapi ; boticapi miniśa kin he yatkanpi ece.

18 Tuka wicaśta owotanna canku tawapi kin he iyoyanpa iyega ohinniyan sam wiyatpa aya ecen anpetu wiyotanhan he iyececa.

19 Wicaśta śica tacankupi kin he aotpaza ; taku en ħicahanpi kte cin he sdotkiyapi śni.

20 Micinkśi, mioie kin awacin wo, taku eciciye cin anoh kiciya wo.

21 Ihnuhan he niiśta kin icunom iyeyakiye cin, nicante kin cokaya yuha wo.

22 Tona he iyeyapi kin he wiconi tawapi ee, qa ceħpi kin ocowasin okizi wicaya ce.

23 Taku duhe cin owasin isanpa nicante kin awanhdaka wo, hetanhan wiconi owahinanpe kin hee ce.

24 Wicopemni nii kin etanhan yutokan wo, qa wicaśtapi śni niiha etanhan hdutehan wo.

25 Niiśta kin nitokam owotanna etonwan kte, niiśtojuha kin nitokapa ecetuya tonwanhanpi kte.

26 Nisiha oye kin awacin wo ; hecen canku yaye cin owasin tanyan yahduśtan kta.

27 Nietapa nicatka ihnuhan unmanna eciyatanhan nihduhomni kin, taku śice cin etanhan nisiha kin ehdaku wo.

WICOWOYAKE 5.

- 1 Micinksi, mitoksape kin awacin wo, wookahnige mitawa kin anoh kiciya wo ;
- 2 Hecen wowayupike duhe kta, qa nisiha kin wosdonye patan kta.
- 3 Witkowin iha kin etanhan tuhmaga canhanpi kaduza, qa caka kin wihdi isanpa sduta.
- 4 Tuka hetanhan taku icage cin peji hota iyecen pa, isan pesto kin iyecen pe hinca.
- 5 Siha kin apamahdedan wiconte oiyahdeya, oye kin wakanšica ti kin iyohiya.
- 6 Wiconi canku kin našna niciye kta e oye kin kpakšikšan, hecen idukcan kte šni.
- 7 Hokšiyopa detanhan anamagoptanpo, qa wicoie mii kin etanhan inape cin ihnuhan ehpeyayapi kin.
- 8 Witkowin kin etanhan canku kin hdutehan wo, qa tatiyopa kin ihnuhan kiyadan de cin.
- 9 Okini nitowašake tokan wicayaqu kta, qa omaka nitawa kin wicašta waonšidapi šni yuhapi kta.
- 10 Okini toka woyuha nitawa kin on inmapi kta, qa taku on htayani kin witkowin ti kin ohna yanke kta ;
- 11 Okini oniwihanketa woyute nitawa nicehpi ko sotapi kinhan šicahowade kta ;
- 12 Qa, Hehehe, tokeca woonspe šice wadaka, qa wahokonmakiyapi kin ihawakta šni he.
- 13 Tona waonspemakiyapi kin nawicawahon šni, qa wahokonmakiyapi ho kin anawagoptan šni ece.
- 14 Wicota qa omniciye cokaya taku šica owasin en ye mičiye kta tuka, ehe kta.
- 15 Minihdoka nitawa kin etanhan hdatkan wo, qa wakpadan mini owe nitawa etanhan kaduze cin nakun etanhan.
- 16 Hecen wakoniya nitawa kin tankaya kaduze kta ; otonwe canku kin ohna mini wakpadan kaduze kta ;
- 17 Hena nišnana nitawa kte, tokan tuwedan tawa kte šni.
- 18 Hecen wakoniya nitawa kin yawaštepi kta, qa honikšidan qehan winohinca duze ciqon he nihduškin kte ;
- 19 Tawiyedan wašte dakapi, qa tatokadan wiciyokipi iyecece kta, azinpi kin imna ničiye kte, anpetu owasin, qa wašte yakidake cin ohinniyar wanipi nunwe.

20 Tokeca micinksi winohinca tokeca wanipi kta, qa witkowin maku kin adoksohan duze kta he ?

21 Jehowa wicašta canku kin owasin wanyake ça token ohanyanpi kin wicakicitkeuta.

22 Iye ecinšniyan ohanye cin he wicašta šice cin kihdege kta, qa iye wahtani ikan kin on hmunkapi kte ;

23 Witkoya ohanye cin ota onuni kta, qa onspekiyapi šni on ɛ kta.

WICOWOYAKE 6.

1 Micinksi, nitakoda wanji taku yecicajuju kta kehe cinhan, qa on wicašta tokeca nape duza hecinhan ;

2 Nii kin etanhan nioie kin he iyanicaškapi ; nii kin on taku ehe cin he niyuzapi ce.

3 Heon micinksi hecen econ wo, qa ihduška wo, nitakoda nape kin iyahpade cinhan hunktiya, ihduhukuya qa nitakoda iyopaštaka wo.

4 Niišta kin en wicašba kin qu šni wo, qa ništojuha kin on ištibe šni wo.

5 Zitkadan tuwe hmunke kta nape kin etanhan ihduška, qa tatokadan wicanape kin etanhan ihduške cin he iyecen ihduška wo.

6 Kuja nanke cin tajuška kin ekta ya wo, yaksape kta e ohanyanpi kin wanyaka wo.

7 He itancan nica, akicita nica, qa wicašta yatapi nica ;

8 Tuka mdoketu eca taku yutapi kihnaka, qa woksapi eca woyute tawa mnayan ece.

9 Tohantu kinhan makan inonke kta ? kuja, ništibe cin etanhan tohantu yekta kta he ?

10 Nihba onge qa ništibe onge, qa makan inonke kta e nape pakšijapi onge ;

11 Hecen wowahpanice kin wicašta icimani wan he iyecen en niu kta, qa wicašta wipe hduha en nihi kin he iyecen taku owasin inicakije kta.

12 Wicašta šica wicaštapi šni i pemni hduha mani ;

13 Išta kin on wiyuta, qa iye siha okiya, qa iye napsukaza on waonspekiya ece ;

14 Wacanšinyapi kin cante mahen ohinniyan taku šica kaga, okicize kin he kada ehpeya.

15 He etanhan ihnuhanna ihdutakuni kte šni, ohankoya yukukapi kta, qa wokicizi wanice kta.

16 Taku šakpe Jehowa šice daka, qa šakowin nagi kin wahtedašni.

- 17 Wicišta wankantuya, qa wicaceji itonpi śni, qa wicanape tona taku śica econpi śni wewicaynpi ;
- 18 Wicacante wicohan śica ewacin, wicasiha taku śica econpi kta e inahniyan inyankapi ;
- 19 Wayaatanin ecinśniyan woitonśni ipohya, qa tuwe hunkawanjin kiciyapi iyakitedan kicikigepi oju kin he nakun.
- 20 Cins, niyate wahokonniciye cin tanyan yuha wo, qa nihun toope kin ehpeye śni wo.
- 21 Hena ohinniyan nicante kin en pahta wo, qa nitahu kin en iyakaśka wo.
- 22 Hecen mayani eca yus aniye kta ece, ništima eca awanniyake kta, qa tohan yekta eca oniciye kta ece.
- 23 Woahope kin he petijanjan qa wicoope kin he iyoyanpa, qa iyopewicayapi woonspe kin he wiconi canku kin ee.
- 24 He winohinca śica etanhan awannihdake kta, winohinca oyate tokeca ceji skuya etanhan.
- 25 He owanyag wašte ešta nicante kin ekta kon śni wo ; qa ištojuha kin on ihnuhan inicu kin.
- 26 Witkowin kin wicašta wan aguyapi ciqadan ekta aye kta, qa wawiciahapi econsa kin wicanagi tehika apasi kta.
- 27 Wicašta wan peta ikpihnake cinhan tawokoyake kin huhnage kte śni he ?
- 28 Tuwe petaga amani kinhan siha kin gu kte śni he ?
- 29 He iyecen tuwe wicašta tokeca tawicu kici iwanke cinhan ; tuwe kašta he yutan kinhan taku śica iyahdeya.
- 30 Tuwe wotektehda on woyute manun qa wipiiciya ešta nina śicedakapi śni ;
- 31 Tuka iyeyapi kinhan śakowin akihde wicakicu kta ; ti kin ohna taku yuke cin owasin ešta wicaqu kta.
- 32 Tuka tuwe wawiciahapi winohinca wan kici econ kin he cante wanica, tuwe hecon kinhan nagi kin ihang kiya.
- 33 He apapi kta, qa ištenyapi kta, qa wowištece kin he kajujupi kte śni.
- 34 Wowinawizi he wicašta tocanteptanye kin ce, tohan tokiçon kinhan wawitonpe kte śni.
- 35 Wokajuju tanka ešta ihakta kte śni, taku ota yaqu ešta iyokipi kte śni.

WICOWOYAKE 7.

- 1 Micinkśi, mioie kin yuha wo, qa mitawoahope kin niye eniçihnaka wo.
- 2 Mitawoahope ništa su kin iyecen yuha wo, qa mitoope kin, hecen yani

kta ;

3 Hena ninapsukaza en apahta wo, qa nicante ojuha kin akan owa wo.

4 Wicoksape kin, Nis tanke ciya eciya wo, qa wookahnige, Mitakuye caje yata wo.

5 Hecen witkowin kin etanhan nipatan kta, wihomniwin i skuya kin etanhan.

6 Wati owanyeye kin hetanhan can ipuskica ohna aowakasin qehan ;

7 Wacintonpi sni wicehna ewatonwan, cincapi ehna koškadan cante nica iyewaya ;

8 Witkowin oise tawa kin ikiyedan mani, canku wan ti kin iyahde kin he ohna ya ;

9 Anpetu owihanketa htayetu, hanyetu otpaza he ehan ;

10 Unkan inyun winohinca kin he itkokipa, witkowin wan iyecen ihduze ça cante kin nakihbe.

11 Owanji yanke sni qa wicakihna, siha kin tipi tawa ohna yakonpi sni.

12 Tuktekten tiyopa ekta, tuktekten canku kin ohna, qa oise owasin ikiyedan wicahmonka.

13 He yuze ça i iputake ça waditagya heciya,

14 Wopida wošnapi mduha, nakaha hanmdepi wahduštan :

15 Heon itkoccipe kta e tankan wahinawape ; niite kin wanciyake kte hinca qa wanna iyeciye.

16 Ohewahde kin sina owinš waya ; Egupton wipatapi on apahdan waton ;

17 Mitowinja kin mura, canšin qa canhaša okahtan waya.

18 Ito unhde ça iyokipi kiciya imnaunkiçiye kte : Hanyetu osan waštekidaya unkiciyuškin kte ;

19 Wicašta kin tin yanke sni, tehan icimani iyaya ;

20 Mazaska ojutonpi nape ohna icu, wi mibe kin anpetu kin he en hdi kta ce.

21 Wicoie skuya ota on he yahomni, iha skuya on yaptanye ya.

22 Unkan ihnuhanna ihakamya mani, tatanka wan tutken patapi kta ekta ye cin he iyecen, qa tahinca hmunkapi kin en inyanke cin he iyecen.

23 Ecen wanhinkpe wan pi kin ipahdan iheyapi ; zitkadan wan hmunkapi en kinyan iyopta, qa on te kta sdotkiye sni he iyecen.

24 Heon micinca anamagoptanpo, qa wicoie mii kin ie cin awacinpo.

25 Ihnuhan nicante kin winohinca kin he oye kin en nihduhomni kinhan, tacanku kin ohna onuniye sni wo.

26 Wicota capapi makata ehpewicaya, wicakte kin hena owasin wašakapi.

27 Ti kin he Hades canku iyahde kin hee, wiconte temahentuya ohna iyaye

wicaya.

WICOWOYAKE 8.

- 1 Awicakehan woksape kin waieyanpaha, qa wookahnige kin hoyeya ece.
- 2 Paha hinca akan najin, canku icipawega ohna.
- 3 Tiyopa icahda, otonwe tiyopa en, tukten tiyopa ohna hiyupi ekta wicakipan.
- 4 Ihopo, wicašta cicipanpi qa Adam cinca kin hoyeciciyapi ce.
- 5 Tona wacinnitonpi šni kin wowayupike onspeiçiciyapo, qa winitkotkopika cante kiksapapo.
- 6 Anagoptanpo, qa iha wahdukawa ca taku owotanna epe kta.
- 7 Micaka kin wowicake eye kta, qa wowicašta šni miiha kin wahte da šni.
- 8 Mii kin etanhan wicoie kin owasin ecetupi, hena en takudan škope šni qa pemni šni.
- 9 Wicašta wiyukcan kin hena owasin mdeza e iyeya, tuwe wosdonye akite cinhan hena owotanna e iyeye kta.
- 10 Mazaska hee šni, tuka waonspeciciyapi kin he icupo, qa mazaskazi hinca hee šni tuka wosdonye kin he kahmigapo.
- 11 Woksape kin he inyan tehihika kin sam iyeya tehika, qa taku kašta iyowicakipi owasin he iyowaja šni.
- 12 Woksape he miye, qa iyotan wamdupika ; taku wayupika sdoniyapi kin hena owasin iyewaya ce.
- 13 Tona Jehowa kokipapi kin hena wicohan šica šicedakapi ; wahaniçidapi, watanka içidapi, šicaya opiiçiyapi, qa wicai pemni kin hena šice wadaka.
- 14 Wahokonwicakiyapi wiconi ko hena mitawa, wokcan kin he miye, wowašake he mitawa.
- 15 Miye eciyatanhan wicašta yatapi wawidakapi, qa itancanpi taku owotanna wakiconzapi ece.
- 16 Miye eciyatanhan itancanpi oyate yuhapi, qa tona maka akan wayacopi itancanyan unpi.
- 17 Tona wašte madapi kin hena wašte wadaka, qa tona hanhanna hin amakitapi kinhan iyemayanpi kta.
- 18 Woyuha ota qa wowitan miciyukan, woicihde suta qa wokiconze.
- 19 Mazaskazi ecedan hin ešta mitawaskuyeca kin he iyotan, qa mazaska kahmigapi ešta taku icahwaye cin hee iyotan wašte.
- 20 Wicoowotanna canku ohna mani wicawaya, wokiconze oye kin cokaya ohna.

- 21 Hecen tona wašte madapi kin hena taku hohośni tawayapi kta, qa wopiye tawapi ojudan wicawakiye kta.
- 22 Jehowa tohan tokaheya mayuhe cigon, takudan icahye śni he itokam kici waun.
- 23 Otokahe wanin ehantanhan sdamayanpi, otokahe ekta maka kin itokam.
- 24 Ośbe wanica hehan matonpi, wakoniya mini ojudan itokam icahmayanpi ;
- 25 He imnija kin sutaya ehdepi śni, qa paha kin itokam icahmayanpi ;
- 26 Maga qa tinta qa maka mdu paha kin kage śni itokam ;
- 27 Mahpiya ehnake çehan en waun ; ośbe akan wohmihbe ehde he ehan.
- 28 Wankantanhan mahpiya śoka otke ya ; ośbe kin etanhan wakoniya yuŝtan he ehan ;
- 29 Miniwanca kin toope qu, qa mini kin huta kin sanpa ye kte śni konze çehan, maka kin sicu kin yasuta qehan ;
- 30 He ehan ikiyedana manka, kici icahmayanpi, anpetu otoiyo hi toiyokipi kin he miye, qa ohinniyan itokam wimduŝkin.
- 31 Wicašta cincapi om imduŝkin, qa maka ounyanpi kin he iyomakipi.
- 32 He etanhan dehan micinca anamagoptanpo. Tona mitacanku opapi kinhan hena pida içiyapi.
- 33 Woonspe kin nahonpo, qa ihduksapapo, ihnuhan he ehpeyayapi kin.
- 34 Wicašta tuwe anamagoptan anpetu owasin mitatiyopa awanyake ç a tiyopa icahda najin kin he wopida.
- 35 Tuwe iyemaye cin he wiconi iyeya, qa Jehowa en woiyokipi aihdutan.
- 36 Tuwe miye en wahtani kin he nagi kin kiunniyan, tona ŝice madapike cin hena wiconte wašte dakapi ece.

WICOWOYAKE 9.

- 1 Woksape tipi tawa wanna kage ç a inyan ŝakowin oahe kin hdakan :
- 2 Tado wanna kpata, miniŝa kin icicahi, qa wahna wotapi kin ekihde.
- 3 Wikoŝka tawa kin ye wicaŝi, wicoie wakan otonwe ohna he ipa kin akan pan yanka.
- 4 Tuwe wacintonŝni deci u wo, cante nicapi kin hewicakiya,
- 5 Kuwapo, aguyapi mitawa etanhan yutapo, qa miniŝa wiyeya ewehde kin etanhan yatkanpo.
- 6 Wicowitkotko kin ehpeyapo, hecen yanipi kta ; qa wokcan canku kin ohna manipo.
- 7 Tuwe waonca wahokonkiye cin he wowiŝtece iyahdeiçiya, qa tuwe

wicašta śica iyopeye cin he ihduśape kta.

8 Wicašta waonca ihnuhan iyopeyaye cin, śice nidake kta naceca ; tuka wicašta ksapa he iyopeya wo, hecen wašte nidake kta.

9 Wicašta ksape cin waonspekiya wo, hecen sanpa ksape kta ; wicašta owotanna wosdonye qu wo, he icu kta.

10 Woksape otokaheya kin he Jehowa kokipapi kin ee, qa taku wakan sdonyapi kin wokcan itancan kin hee.

11 Miye on anpetu nitawa niciyuotapi kta ; nakun wiconi omaka yuhe ciciye kta.

12 Yaksape cinhan nitoksape taku aicage cin he nitawa kta, qa waonyace cinhan niśnana śitkihda niçiye kta.

13 Winohinca witkotkoka kin he iwakan, wacintonśni qa takudan sdonye śni.

14 Iye ti tiyopa kin icahda iyotanka, otonwe pajodan ohna canakanyotankapi akan.

15 Ahiyayapi kin wicakipan, canku katinyan omanipi kin hena ;

16 Tuwe wacinton śni kinhan, kuwa wo, eciya, qa tona cante nicapi hewicakiya,

17 Mini manonpi kin he skuya ce, qa aguyapi nahmana yutapi kin he wiciyokipi ce, eya.

18 Tuka hen wicanagi yakonpi, tona wicakico Hades osmaka kin ohinhpayapi wicašta kin sdonye śni.

WICOWOYAKE 10.

1 Wicoie wakan Salomon tawa. Hokśiyopa ksapa eca atkuku iyuśkin kiya ece ; tuka hokśiyopa witkotkoke cin he hunku kin iyokiśinya.

2 Wicohan śica on mazaska mnayanpi kin owicakiyapi śni ; tuka wicoowotanna wiconę etanhan waehdaku.

3 Jehowa wicašta owotanna nagi kin akihan ye kte śni, tuka wicašta śica taku cinpi ehpewicakiciya ece.

4 Tuwe nape kuje cinhan ihduwahpanica, tuka wicanape miniheca kin he wijinwicaya ece.

5 Tuwe mdoketu eca wamnayan ece kin he hokśiyopa wayupika, tuka tuwe wamnayanpi icunhan iśtinbe cin he hokśiyopa wawiśtenya ece.

6 Wicašta owotanna pa kin yawaštepi, tuka wowištece wicašta śica i kin aohdute ye kta.

7 Wicašta owotanna kiksuyapi kin yawaštepi kta, tuka wicašta śica caje

kin kuke kta.

8 Tuwe cante ksape cin he wahokonkiyapi icu kta, tuka tuwe iha witkotkoke cin he wankahe kta.

9 Tuwe wohnyaye wanin mani kinhan okope codan mani kta ; tuka tuwe canku kin hdupemni kin he sdonyapi kta.

10 Tuwe ísta kin on wiyute cin he woyokiśice icahya, qa tuwe iha witkotkoke cin he hicahe kta.

11 Wicašta owotanna i kin wiconi minihdoka kin hee, tuka wicowohitike kin wicašta śica ipi kin akaḥpe kta.

12 Wośicedake kin wicakigepi kaga, tuka wowaśtedake kin he woahntani owasin akaḥpa.

13 Wicašta wiyukcan iha kin ohna woksape iyeyapi kta, tuka wicašta cante nice cin nite ekta cansakadan kta.

14 Wicašta ksape cin hena woksape nakiḥmanpi, tuka tuwe witkotkoka i kin ecadan inihan kta.

15 Wicašta wawokihika towijice kin conkaśke suta kin hdawa, tuka wowahpanice wicašta onśika yuśinye wicaya.

16 Wicašta owotanna kin wiconi iyuwin yapi, tuka wicašta śica woahntani icaḥyapi ece.

17 Tuwe woonspe hduhe cin he canku wiconi iyahde kin he opa ; tuka tuwe wahokonkiyapi awakicin śni kinhan nuni.

18 Tuwe iha itonpi śni on wocanniye anakiḥbe, ɕa tuwe wowištece yaotanin kin íś eya witkotkoka.

19 Tuwe wicoie ota ie cin wahtani, tuka tuwe iha nina hduhe cin he ksapa.

20 Wicašta oḥan owotanna cante kin he mazaska kaḥnigapi, wicašta śica cante kin he taku śni.

21 Wicašta owotanna iha kin wicašta won wicaya ece, tuka wicašta witkotkopi kin cante nicapi on ɕapi kta.

22 Jehowa toyawašte kin wawijinya kin hee, qa iyahna woyokiśica opeye śni.

23 Taku śica econpi kin wicašta witkotko imagaga iɕiyapi, tuka wicašta wiyukcan woksape opa.

24 Wicašta śica taku ikope cin he akipe kta, qa wicašta owotanna taku cin kin he kiɕupi kta.

25 Tate iyumni ahiyaya eca wicašta śica en un kte śni ; tuka wicašta owotanna oahe kin owihanke wanica.

26 Hastanhanka toto wicahi kiuniyan, qa śota wicišta kin en he iyecen wicašta kuja tona yeśipi kin en.

27 Jehowa kokipapi kin he anpetu wicakiciyuota, tuka wicašta śica omaka tawapi kin wicakiciyuotecedanpi kta.

28 Wicašta owotanna wowiyuśkin aepi, tuka wicašta śica taku aepi awihnuni kta.

29 Jehowa tacanku kin wicašta wašte waśag wicaya ece, tuka wicašta śica yuśinyewicaya.

30 Wicašta owotanna ohinniyan yuhohopi kte śni, tuka wicašta śica maka kin ounyanpi kte śni.

31 Wicašta owotanna i kin woksape hinanpe ya, tuka wopemni ceji kin baśpapi kta.

32 Wicašta owotanna iha kin taku wiciyokipi sdonya, tuka wicašta śica ipi kin wicośkiśke.

WICOWOYAKE 11.

1 Wohnayan tke utapi kin he Jehowa wahtedaśni, tuka tke utapi ecetu kin he Jehowa toiyokipi ee.

2 Tohan wahanıçidapi hi kinkan wowištece he nakun u ece, tuka woksape onśihanpi kin wicayukan.

3 Wicašta wašte towaštepi kin awicaye kta, qa wicašta śica topemni kin ihang wicaye kta.

4 Wocanniye anpetu ehan woyuha takudan okihi śni, tuka wicoowotanna wiconę etanhan waehdaku.

5 Wicašta wašte toowotanna kin canku wicakiciyumdaye kte, qa wicašta śica tohan śicapi kin on hicahanpi kta.

6 Wicašta ecetupi kin toowotanpi kin wicakiyuśka ece, tuka wicašta wakonsa tawohnayanpi kin wicahmunka.

7 Tohan wicašta śica ę cinhan taku cin qon awihnuni kta, qa taku wicašta ohan śica aepi atakuni śni ece.

8 Wicašta owotanna woyokiśice etanhan inapa, qa wicašta śica wan he en hiyu.

9 Wicašta wahnayan iye i kin on takodaku ihangya, tuka wicašta owotanna tosdonyepi kin he ewicahdaku.

10 Wicašta owotanna tanyan unpi kinhan otonwe kin iyuśkin, qa wicašta śica awihnunipi eca wiyuśkinyan dowanpi ece.

11 Wicašta ecetupi yawaštepi kin he otonwe kin yawankantuya, tuka wicašta śica ipi kin he yajuju.

12 Tuwe takodaku wahtedaśni kin he cante nica, tuka wookahnige wicašta kin inina yanka.

- 13 Waaiesa kin taku nahmana oyakapi kin he yaotanin, tuka tona woniya wacinyepica kin hena wicoie anahmanpi ece.
- 14 Tukten wahokonkiyapi wanice cin hen oyate wankahe kta, tuka wiyukcanpi ota on etanhan wicani.
- 15 Tuwe wicašta tokeca taku icazo kicicajuju kta keye cinhan kiunni kta, tuka tuwe he wecicajuju kta eye kapin kin he wacinyepica.
- 16 Winohinca wašte wowitan yuhe kta, qa wicašta waśaka woyuha patanpi ece.
- 17 Wicašta wacantkiya iye nagi tanyan ecakicon ; tuka tuwe waonśida śni kin he iye cehpi kin kiunni.
- 18 Wicašta śica wohnyaye wohtani econpi ; tuka tuwe woowotanna oju kin iyuwin wicaka yuhe kta.
- 19 He iyecen wicoowotanna on wicani, qa tuwe wicohan śica ope cinhan teiçiya.
- 20 Tona cante pemniyan unpi kin hena Jehowa wowahtedaśni, tuka tona tacanku ecetupi kin hena iyokipi yapi.
- 21 Wicanape tokan nape ekta yekiyapi ešta wicašta śica śitkihdayapi kta ; tuka wicašta owotanna cincupi kin he inape kta.
- 22 Winohinca owanyag wašte tuka woksape nice cin he mazaska oinna kukuše pasu kin ohna kin he iyececa.
- 23 Wicašta owotanna taku wašte heceedan cinpi, tuka wicašta śica wocanniye apepi.
- 24 Wanji wakadada ešta sanpa mnayan, qa wanji taku owotanna isanpa tehinda ešta ihduwahpanica.
- 25 Wicanagi wayawašte kin he cepe kta, qa tuwe waamnimni kinhan amnimnipi kta.
- 26 Tuwe wamnaheza tehinda kin he oyate kin yaśicapi kta, tuka tuwe he iyopeye cinhan woyawašte pa akan un kta.
- 27 Tuwe wowašte nina akite cinhan woiyokipi iyeye kta, qa tuwe taku śica ode kinhan he iyohi kta.
- 28 Tuwe towijice kin wacinkiye cinhan hicahe kta, tuka wicašta owotanna canwapa iyecen tanyan icagapi kta.
- 29 Tuwe iye ti kin iyokiśinye cinhan tateyanpa ekicihnakapi kta, qa tona witkotkokapi kin hena, tuwe ksape cin wowidag wicaye kta.
- 30 Wicašta owotanna taku icaħye cin he can wiconi kin ee, qa tuwe wicanagi ohiwicaye cin he wicašta ksapa.
- 31 Wicašta owotanna maka akan iyuwin yuhe kta, hecinhan wicašta śica qa wahtanisa isanpa hececapi kta.

WICOWOYAKE 12.

- 1 Tuwe wahokonkiyapi wašte dake cinhan wosdonye wašte daka qa tuwe iyopekiyapi kin síce daka he witkotkoka.
- 2 Jehowa wicašta wašte cantekiya, tuka tuwe taku síca awacin kin he yaco kta.
- 3 Wicašta wicohan síca eciyatanhan sutaya he kte śni, tuka wicašta owotanna hutkan tawapi kin hohodan kte śni.
- 4 Tuwe hihnaku íštenkiye cin he huhu owasin kuke kiya iyececa, tuka winoħinca ksapa wan hihnaku wateśdake tawa kin hee.
- 5 Wicašta owotanna cante ozepi kin hena ecetupi, tuka wicašta síca wahokonkiyapi kin he wohneye.
- 6 Tona síca oiepi on wicawe hmunkapi, tuka wicašta owotanna i tawapi ewicayakupi kta.
- 7 Wicašta síca kawankapi qa en unpi śni, tuka wicašta owotanna tipi kin sutaya he kta.
- 8 Wicašta token ksapa he iyecen yatanpi kta, qa tuwe cante pemni kin woihaktapi śni un kta.
- 9 Tuwe ihaktapi śni ešta ookiye wan yuhe cinhan tuwe ihduonihan qa aguyapi codan un kin he isanpa tanyan un ece.
- 10 Wicašta owotanna kin tawoteca ni un kin en ewacin ece, tuka wicašta síca wawacinkta yuzapi kin he wohitika.
- 11 Tuwe tamaga kicanye cin he aguyapi imnaiçiye kta, tuka tuwe takuśniśni kuwa kin he cante wanica.
- 12 Wicašta síca kin śicapi conkaške tawapi cin ece, tuka tona owotanna hutkan tawapi kin taku icaħya.
- 13 Iha itonpi śni kin on śicaya wicahmunkapi, tuka wicašta owotanna wokakije etanhan inanpe kta.
- 14 Wicašta i waskuyeca tawa kin he etanhan taku wašte on immapi kta, qa taku iye nape kage cin he kicupi kta.
- 15 Wicašta witkotko canku tawa kin he owotanna kecin, tuka tuwe wahokonkiyapi anagoptan kin he ksapa.
- 16 Wicašta witkotko tocanniye kin ecadan hdutanin, tuka wicašta wayupika íštenyapi kin ahdaħpa.
- 17 Tuwe wowicake ie cinhan taku owotanna yaotanin, tuka wayaatanin itonśni kin he wohneye.
- 18 Wicašta wan isan cawicape iyecen ia, tuka tona ksapa cejipi kin he wookizi.
- 19 Wowicake iha kin he ohinniyan suta kta, tuka ceji itonśni kin he

aškayedan.

20 Tona taku síca awacinpi cantepi kin ohna wohnye yukan, tuka wookiye wahokonkiyapi kin hena wowiyuśkin.

21 Wicaśta owotanna takudan síca iyahde śni unpi kta, tuka tona śicapi kin hena taku síca ojupidan.

22 Wicaiha itonpiśni kin Jehowa wahtedaśni, tuka tona ecetu ohanyanpi kin hena toiyokipi kin ce.

23 Wicaśta ksapa wosdonye ahdahpa, tuka tona witkotkoka cantepi kin wacintonpi śni ieyanpaha.

24 Wicanape miniheca kin he wawidake kta, tuka wicaśta kuje cin he wowidake yapi kta.

25 Woiyokiśice wicaśta cante mahen he patuśya, tuka wicoie wašte wan he iyuśkin ya.

26 Wicaśta owotanna kin tawaśitku kin kapeya, tuka wicaśta síca tacankupi kin wicahnayan.

27 Wicaśta kuja taku ihni kin he pasnu śni, tuka wicaśta miniheca woyuha tawa kin he tehika.

28 Wicoowotanna canku kin ohna wiconi, qa oye canku kin ohna wiconę wanica.

WICOWOYAKE 13.

1 Hokśidan ksape cin he atkuku wahokonkiya nahon, tuka waoncesa iyopekiyapi eśta nahon śni.

2 Wicaśta wan i kin taku icañye cin etanhan taku wašte yute kta, tuka tona pemniyan ohanye cin nagipi kin wicowohitike yutapi kta.

3 Tuwe i kin awanhdake cin he nagi kin kpatan, tuka tuwe iha kin hdugaga woiyokiśica yuhe kta.

4 Wicaśta kuja nagi kin taku cin tuka wanica ; tuka tona miniheca nagipi cepapi kta.

5 Wicaśta owotanna wicoie wicake śni śice daka, tuka wicaśta síca honwin qa ištece kta.

6 Wicoowotanna tona ecetupi kin wicapatan, qa wicohan síca kin wahtanipisa nawicahnaye kta.

7 Wanji ihdawijica tuka takudan yuhe śni, qa wanji ihdawahpanica eśta woyuha ota ton.

8 Wicaśta wan toni kin opekiton kta e towijice kin iyopekiya, tuka wicaśta síca iyopeyapi nahon śni.

9 Wicaśta owotanna toiyoyanpa kin wiyuśkin kiya, tuka wicaśta síca

petijanjan tawapi kin bowicakisnipi kta.

10 Wahaniçidapi kin hecedan waakinicapi kaga, tuka tuwe wahokonkiyapi nahon kin he ksapa.

11 Wicahnayanpi kin eciyatanhan woyuha kin he wanistina aye kta, tuka tuwe iye nape kin on kamna kin he hduota kta.

12 Woape kin yutehanpi kin cante kin iyokişin ya, tuka taku cinpi kin iyohipi kin he wiconi can kin he iyececa.

13 Tuwe wicoie kin ihakta şni kin ihang içiye kta, tuka tuwe woahope kin ikope cin iyuwin yuhe kta.

14 Wicaşta ksapa toope kin he wiconi wakoniya kin heca, on wiconę wihmunke yuiyokapi.

15 Tawacin waşte kin wicoiyokipi icaħya, tuka tona wahtedaşniyan ohanyanpi kin canku tawapi kin he tehika.

16 Wicaşta ksapa otoiyohi wosdonye on taku econ, tuka tuwe wacintonşni towitkotkoke cin hduotanin.

17 Wahoşiya şica taku şica ohinhpaya ece, tuka wahoşiya wicake cin he wookizi.

18 Tuwe woonspe ehpekiye cinhan wowahpanica wowiştece iyahna içicaga, tuka tuwe iyopekiyapi awacin kin he kinihanpi kta.

19 Taku cinpi kin iyohipi kinhan wicanagi kin iyokipi, tuka wicoħan şica ayuştanpi kin he wicaşta witkotkopi wahtedapi şni.

20 Tuwe wicaşta ksapa om mani kinhan ksape kta, tuka tuwe wicaşta witkotkoke koda wicaye cinhan hee ihang yapi kta.

21 Taku şica wahtanipisa wicapasi, tuka tona owotanna taku waşte wicakicupi kta.

22 Wahtanisa woyuha tawa kin wicaşta owotanna wicakicihnakapi, qa wicaşta waşte cinhintku cincapi kin woyuha tawa wicakiye kta.

23 Wicaşta wahpanica mahkicanyanpi on woyute ota icaga, tuka owotanna ohanyanpi şni on apa awihnuni.

24 Tuwe wicapsinte tpatan kin he cinhintku şice kidaka, tuka tuwe he waşte kidake cin he kohanna iyopekiya.

25 Wicaşta owotanna nagi kin imnahan wota ece, tuka wicaşta şica tezipi kin akihanpi kta.

WICOWOYAKE 14.

1 Winohinca ksape cin otoiyohi tipi içicaga ece ; tuka witkotkoke cin he iye nape kin on ti kin hdujuju.

2 Tuwe iye toecetu kin omani kin he Jehowa kokipa, tuka tuwe canku kin

hdupemni kin he ihakta śni.

3 Wicašta witkotko ipi kin ohna wahaniçidapi sagye yukan, tuka tona ksapapi ihapi kin wicahduhapi.

4 Tukten tatanka wanica hen aguyapi tipi takudan ohnaka śni, qa oicage ota kin he tatanka waśake cin he eciyatanhan u ce.

5 Wayaatanin wicake cin he itonśni wanice kta, tuka wayaatanin ecinśniyan kin he woitonśni ipohya.

6 Waoncesa woksape akita ešta he iyeye śni, tuka tuwe wookahnige cin he wosdonye waśakadan iyeya.

7 Wicašta witkotkoka itokapatanhan ya wo, qa nakun tuwe woksape iha yuhe śni sonyaye cinhan.

8 Wicašta wayupika toksape kin he tacanku kin iyukcan, tuka wicašta witkotko towitkotkopike cin he wohnye.

9 Wicašta witkotkopi kin woahtani ihahayapi, tuka tona ecetupi kin ehna wacantkiyapi yukan.

10 Wicacante nagi kin toiyokiśice cin sdotkiya, qa towiyuśkin en tokan icicahiye śni.

11 Wicašta śica tipi kin kawankapi kta, tuka wicašta ecetupi tawakeyapi icage kta.

12 Canku wanji ecetu seca wicašta itokam, tuka he iyohakamya wiconęe iyahdeya.

13 Nakun tuktekten ihahapi icunhan cante śicapi, qa wowiyuśkin kin he ihanke kin ekta woiyokiśica.

14 Tuwe cante namni kin iye tacanku kin on imna kta, qa wicašta wašte iye cante oze on ipi kta.

15 Tuwe wacintonśni kin wicoie owasin wicada, tuka wicašta wayupika caehde kin iwanhdaka.

16 Wicašta ksapa kokipe ça taku śica etanhan ihduhomni ece, tuka wicašta witkotkoke cin iyopta iyaye ça waciniçiya.

17 Tuwe wacinko kinhan witkotkoya ohanyan, qa tuwe taku śica cantiheye cin śice dakapi kta.

18 Tona wacintonpi śni wowitkotko kin tawayapi, tuka wicašta ksapa wosdonye wateśdag tonpi.

19 Wicašta śica tona waštepi wicitokam patujapi, qa tona owotanna tatiyopa itokam.

20 Kodawicaya ešta wicašta wahpanica kin śicedakapi, tuka wicota wijica wan taku yapi.

21 Tuwe takodaku ihakta śni kin wahtani, tuka tuwe tona onśika onśiwicakida yawaštepi kta.

- 22 Tona taku síca kagapi kin hena nunipi, tuka tona taku wašte kagapi wacantkiyapi wowaonśida ahna tawayapi.
- 23 Taku kicanyanpi kin owasin on taku mnayanpi ece, tuka wicaiha iapi kin wicayuwahpanica heceedan.
- 24 Wicašta ksapa woyuha tawapi kin he wateśdag tonpi, tuka tona wacintonpi śni towitkotkopike cin he wowitkotko.
- 25 Wayaatanin wicake cin he wicanagi ewicayaku, tuka wayaatanin wahnaye cin woitonśni ipohya.
- 26 Jehowa kokipapi kin en wowacinye suta yukan, qa tuwe hecon cinca kin hena wowinape yuhapi kta.
- 27 Jehowa kokipapi kin he wiconi minihdoka kin hee, on wiconę wihmunke kin etanhan ihduśpapi.
- 28 Oyate ihduotapi eca wicašta yatapi kin wowitan yuha ece, tuka oyate kin wanistina aye cinhan atakuni kte śni e ikopa.
- 29 Tuwe tehan canteptanye śni kin he wiyukcan tanka, qa tuwe wacinko kin he towitkotkoke cin hdutanin.
- 30 Cante zanika cełpi nikiya kin hee, tuka winawizipi kin he wicahu kin yukuka kin hee.
- 31 Tuwe wicašta onśika wan sanpa yuwahpanice cin he tuwe he icałye cin he íštenya, tuka tuwe he ohoda kin he wahpanicapi kin cante wicakiya ece.
- 32 Wicašta síce cin taku síca en napeyapi kta, tuka wicašta owotanna řa ešta taku wacinyan un.
- 33 Woksape kin wicašta wiyukcan cante kin ohna iyozi, qa wicašta witkotko cokaya kin sdonyapi kta.
- 34 Wicoowotanna kin he oyate kin wowitan icalwicakiciye cin ee, tuka woahani kin he oyate wowištece kin ee.
- 35 Ookiye ksapa kin wicašta yatapi toiyokipi kin hee, tuka tuwe wowištece kage cin he canniye kta.

WICOWOYAKE 15.

- 1 Ĥbayedan waayupte cin he wowacinko anapta, tuka wicoie tełike cin he wocanteptanyan kaga.
- 2 Wicašta ksapa cełipi kin wosdonye yawašte, tuka wicašta witkotko ipi kin wowitkotko enapeya.
- 3 Jehowa íšta kin owancaya wicašta síca wicašta wašte ko owasin iyohi wicaya.
- 4 Wicacełi wawokizi ye cin he can wiconi kin iyececa, tuka wicacełi wayapemni kin wicanagi kin he yawega.

- 5 Tuwe witkotko kin he atkuku wahokonkiye cin ihakta śni, tuka tuwe iyopeyapi iyowiničiye cin he ksapa.
- 6 Wicašta owotanna ti kin ohna woyuha tanka yanka, tuka wicašta śica taku mnayanpi kin en woškiške yukan.
- 7 Tona ksapa ihapi kin wosdonye kadadapi, tuka tona witkotko cantepi kin hecetu śni.
- 8 Wicašta śica wośnapi kin he Jehowa wowahteda śni, qa wicašta ecetupi kin cekiyapi kin he iyokipi.
- 9 Wicašta śica tacanku kin he Jehowa wahtedaśni, qa tuwe woowotanna ope cin he wašte daka.
- 10 Tuwe canku ehpeye cin wahokonkiyapi kin iyokipi śni, qa tuwe iyopekiyapi śice dake cin he ƣe kta.
- 11 Jehowa wicaƣe cin nagipi kin qa tancan atakunipi śni owasin wanyaka, nakun Adam cinca cante ozepi kin owasin.
- 12 Waoncesa wahokonkiyapi wašte dake śni, qa wicašta ksapapi kin ekta ye kte śni.
- 13 Wicacante wiyuśkin kin he itohnake wašte kaga, tuka cante wicaśice cin on wicoksape kin kawanka.
- 14 Wicacante ksape cin wosdonye akita, tuka witkotko ipi kin wowitkotkoke woyute yapi.
- 15 Tona iyokiśica anpetu tawapi owasin śicapi, tuka cante wašte kin wohanpi en ohinniyan opapi kin he iyececa.
- 16 Jehowa wokokipe yapi taku cistina yuhapi ešta hee wašte, tuka woyuha tanka wicoškiške iyahna hee wašte śni.
- 17 Wahpe tanka heceedan ešta cante wašteya kiciyus yutapi kin hee wašte, qa tatanka cepa ešta cante śicaya kiciyus yutapi kin hee śica.
- 18 Wicašta wacinko kicigepi kaga, qa tuwe tehan canteptanye śni woakinica anapta ece.
- 19 Wicašta kujapi tacankupi kin wapepeka mahinatake wan iyececa, tuka wicašta owotanna tacanku kin he yumdayapi.
- 20 Hoksídan ksape cin he atkuku wiyuśkin kiya, tuka wicašta witkotkoke cin he hunku kin ihakta śni.
- 21 Tuwe cante nice cin he wowitkotkoke cin wiyuśkinyan, tuka wookahniga wicašta ecetuya mani.
- 22 Wiyukcanpi wanice cinhan cante ozepi kin atakuni śni ece, tuka wiyukcanpi ota on yusutapi kta.
- 23 Wicašta i kin tanyan waayupte cin on iyuśkin kta, qa wicoie iyehantu kin he wašte hinca.
- 24 Wiconi canku kin wankantuya wicašta ksapa opa, hecen Hades

ihukuya kin yuiyogya.

25 Jehowa wahaniçida ti kin yujuju, tuka wiwazica ti kin yusuta ece.

26 Cante ozepi şikşica kin Jehowa wahtedaşni, tuka wicoie wakaşoteşni kin he iyokipi.

27 Tuwe şikşicaya wakamna kin he iye ti kin iyokişinya ece, tuka tuwe taku qupi kin şice dake cin hee ni kta.

28 Wicaşta owotanna cantepi token waayupte kta awacin, tuka tona şica ipi kin taku şica enapeya ece.

29 Wicaşta şicapi kin Jehowa itehanyan wicaun, tuka wicaşta owotanna cekiyapi eca nawicahon ece.

30 Wicaşta iyoyanpa kin he wicacante iyuşkin, qa taku waşte nahonpi kin wicahuhu cemya ece.

31 Wicanoge wiconi woiyopeye nahon kin he wicaşta ksapa om wanke kta.

32 Tuwe woonspe aktaşni kin he iye nagi kin ehpekiya, qa tuwe woiyopeye nahon kin he cante ton.

33 Jehowa kokipapi kin woksape woonspe kin ee, qa onşihan içidapi kin he wowitan itokamya u ece.

WICOWOYAKE 16.

1 Cante ozepi kin wicaşta etanhan, tuka Jehowa ceji woayupte kin he qu.

2 Wicaşta iye tacanku kin owasin ecedan kecin, tuka woniya wicatkeuta Jehowa hee.

3 Nitohtani kin Jehowa en yakizamni wo, hecen nicante ozepi kin yusutapi kta.

4 Taku Jehowa kage cin owasin akiciyuptapi, qa wicaşta şica anpetu şice cin on nakun.

5 Wicacante wahaniçida kin otoiyohi Jehowa wowahtedaşni, nape iciyahdeyapi eşa iyopewicayapi kta ce.

6 Wowaonşida wowicake iyahna on woahntani kajujupi, qa Jehowa kokipapi kin on taku şica etanhan inapapi.

7 Tohan wicaşta wan ohan kin Jehowa iyokipi kinhan tona tokayapi qon takuyapi kta e kaga.

8 Woowotanna kici taku cistina eşa hee waşte, qa woyuha tanka ecetu şni mnayanpi kin he şica.

9 Wicaşta cante kin tacanku kin hdukcan, tuka cahde tawa kin Jehowa konza.

10 Wokcan wicoie wan wicaşta yatapi iha kin etanhan, wayaco eca i kin nuni kte.şni.

- 11 Tke utapi ecetu kin he Jehowa etanhan, ojuhadan ohna inyan un kin hena owasin iye kaga.
- 12 Wicašta yatapi kin śicaya ohanyanpi kin wowahtedaśni yanpi kte, nakaes woowotanna kin oiyotanke kin yusuta.
- 13 Wiciha owotanna wicašta yatapi iyowicakipi, qa tuwe ecetuya ie cin he wašte dakapi kta.
- 14 Wicašta yatapi tocanniye kin he wiconę wahošiwicaya iyececa, tuka wicašta ksapa wan he anapte kta.
- 15 Wicašta yatapi itohnake kin iyoyanpa kin ohna wiconi yukan, qa cante wicakiye cin he magaju ehake kin he iyececa.
- 16 Woksape mnayanpi kin hee iyotan, qa mazaskazi hee śni ; qa wokcan iyohiyapi kin he mazaska isanpa cinpi kte.
- 17 Taku śica yuiyokapi kin he wicašta ecetupi tacanku yumdayapi kin hee, qa tuwe iye ohan kin awanhdake cin he nagi kin kpatan.
- 18 Wicotakuniśni itokamya watankaicidapi u, qa wicawankahe kte cin itokam woniya wahanicida ya ece.
- 19 Onśipika om woniya onśihan icida kin hee wašte, qa wahanicidapi om taku kipi kicipamnipi kin en opapi kin he śica.
- 20 Tuwe wicoie kin awacin kinhan taku wašte iyeya, qa tuwe Jehowa wacinye cin he yawaštepi kta.
- 21 Tuwe cante ksape cinhan wokcan eciyapi kta, qa iha oskuye cin he woonspe icahye kta.
- 22 Tuwe woksape yuhe cin he wiconi wakoniya wan seca yuha, tuka wicašta witkotko onspekiyapi kin he wowitkotko.
- 23 Wicacante ksape cin he i kin wayupikiya, qa iha kin akan woonspe aokijuya ece.
- 24 Wicoie wiciyokipi tuhmaga canhanpi kin he iyececa, wicanagi woskuye kin, qa wicahuhu okizi kin hee.
- 25 Canku wanji ecetu seca wicašta itokam ešta, iyohakamya wiconę canku kin iyahdeya.
- 26 Tuwe htani kin he iye on htani, i kin iyopaštaka nakaes.
- 27 Wicašta wicaštapi śni kin taku śica kicanye ça, iha kin ohna peta ideya seca.
- 28 Woopemni wicašta kin he woakinice icahya, qa wicašta śin woyag un kin he takodakiciyapi wicayamdece cin hee.
- 29 Wicašta wakisa kin takodaku kihnyan, qa canku wan wašte śni kin omanikiya.
- 30 Woyapemni kin yukcan kta e išta kin ohmus ikikeu, qa iha kin hdahtaka wicohan śica hduştan.

- 31 Wicapa ska woowotanna canku kin ohna iyeyapi kinhan wateśdake owaśtecaka kin hee.
- 32 Tuwe tehan canteptanye śni kin he wicaśta waśaka kapeya, qa tuwe toniya wowidag kiye cin he wicaśta otonwe icu kin he kapeya.
- 33 Wicaśta econpidan kansu kin ojuha ohna iyeyapi, tuka token hinanpe kta Jehowa konza.

WICOWOYAKE 17.

- 1 Aguyapi onśpadan wapaye codan eśta wokiyapi en hee waśte, qa tipi wan tado akinicapi ojudan kin hee śica.
- 2 Ookiye ksape cin he cinca iśtenwicakiye cin he wowidag ye kta, qa sunka kiciyapi om taku tawayapi kta en wopamni yuhe kta.
- 3 Maka wakśica ohna mazaska iyutapi, qa maza oceti ohna mazaskazi, tuka Jehowa wicacantepi kin iwicayuta.
- 4 Wicaśta śica wiciha ecinśniyan anagoptan, qa tuwe itonśni kin ceji awihnnuniyan kin anoh kiciya.
- 5 Tuwe wicaśta wahpanica kin iha kin he tuwe he kage cin iśtenya, qa tuwe tokan yuśakapi kin on iyuśkin śitkihdayapi kta.
- 6 Cinca qa sanpa cinca kin hena wicahinca wateśdag yapi, qa hokśipidan atkukupi kin wowitan wicayapi ece.
- 7 Iapi tanka kin wicaśta witkotkopika iyewicacecapi śni, qa he isanpa iha itonpi śni kin wicaśta tokapapi kin iyowinićiyapi kte śni.
- 8 Taku wicaqupi inyan wicimdeza iyececa tuwe he yuhe cin iśta kin itokam, taku kaśta ektakiya yuhomnipi taku okihi.
- 9 Tuwe woahntani akahpeton kin he otakuye akita, qa tuwe he oyakesa he kodakiciyapi tanka yujuju.
- 10 Iyopeyapi kin wicaśta ksapa nina yaskinya, tuka opawinge apapi keś wicaśta witkotko kin awacin śni.
- 11 Tuwe wakipajin taku śica hecedan akita, heon wahośi wohitika ekta ye śipi kta.
- 12 Eeś wicaśta wanji wahanksica cinca owasin kitanin śni akipe cin he tehika eśta, wicaśta witkotkoka towitkotkoke cin ohna he isanpa tehika.
- 13 Tuwe taku waśte on taku śica iyowinye cinhan, taku śica iye ti kin ayuśtan kte śni.
- 14 Okicigepi otokahe kin he mini okadusyapi kin he iyececa, heon akinicapi kin ihdutaninśni itokam ehpeya wo.
- 15 Tuwe wicaśta śica yaowotanna, qa tuwe wicaśta owotanna yaśice cin hena napin Jehowa wowahtedaśni.

- 16 Taku on etanhan woksape opeton kta e witkotkoka nape ohna maza yukan tuka cante wanica ?
- 17 Kodayapi wan ohinniyan takodaku cante kiye kta, qa tehiya unpi eca owicakiye kta ece kin heon sunkayapi wan wicakicitonpi.
- 18 Wicašta cante nice cin takodaku itokam icazopi kicicajuju kta keye ça nape yekiya.
- 19 Tuwe wokipajin wašte dake cin he akinicapi wašte daka, qa tuwe tatiyopa kin hduwankantuya kin he ihang içiye kta e akita.
- 20 Tuwe cante pemni kin he taku wašte iyeye kte śni, qa tuwe ceji kin hdatokeca kin he taku śica ohinhpaye kta.
- 21 Tuwe cinca witkotko wan kage cin he woiyokiśin içiya, qa hokśidan wicaštaśni atkuku kin iyuśkin kte śni.
- 22 Wicacante wiyuśkinyan tanyan okizi wicaya, qa woniya iyokiśice cin he wicahuhu kin naśeca.
- 23 Taku itpi etanhan qupi kin he wicašta śica icu, qa woyaco canku kin yapemni.
- 24 Wokcan wicašta kin itokamya woksape yukan, tuka wicašta witkotko išta kin maka ihankeya kin etonwanpi.
- 25 Hokśidan witkotko kin he atkuku okiçuninya, qa tuwe ton kin iyokiśinya ece.
- 26 Wicašta owotanna iyopewicayapi kin he wašte śni, wicašta tokapapi kin taku ecetu kin on awicapapi kin he nakun.
- 27 Tuwe oie kin kpatan kin he wosdonye sdonya, qa woniya inina kin he wookahnige wicašta.
- 28 Tuwe witkotkoka ešta inina un kin hehanyan ksapa kecinpi kta, iohmus un kin he wiyukcan.

WICOWOYAKE 18.

- 1 Wicašta wan iyokipi içiye kta e iśnana iyaye ça taku awacinpi kin owasin on wicakige.
- 2 Wicašta witkotko wookahnige iyokipi śni, tuka cante kin toketu ihdutanin kta he iyokipi.
- 3 Wicašta śica u kinhan woaktaśni nakun u, qa wicakigepi kin he iwicašteca opa.
- 4 Woksape wakoniya kin he wakpa kaduze cin heca, wicašta i kin etanhan wicoie kin mini śma kin he iyececa.
- 5 Wayacopi en wicašta śica wan ihaktapi on wicašta owotanna yapemnipi kin he wašte śni.
- 6 Wicašta witkotko iha kin akinicapi en ye içiya, qa i kin apapi kin kipan.

- 7 Wicašta witkotko i kin ihdutakunišni, qa iha kin iye nagi kin kihmunka ece.
- 8 Tuwe iwakan kin oie kin woyute skuya kin iyececa, wicatezi kin mahentuya iyaya ece.
- 9 Nakun tuwe tohtani on kuje cinhan tuwe woyuha ihang ye cin he cinye ya.
- 10 Jehowa caje kin conkaške suta wan heca, wicašta owotanna kin hen onapa qa okope wanin yanke.
- 11 Wicašta wijica taku yuhe cin he otonwe suta, qa conkaške tehanwankantuya iyececa kecin.
- 12 Nawegapi kin itokam wicacante kin wahaniçida, qa wowitan itokam onsihan içidapi kin.
- 13 Tuwe taku nahon šni itokam waayupte cin he witkotko içiye ça kiunniçiya.
- 14 Wicašta tancan yazan ešta taniya kin wakişaka ece, tuka wicaniya naşujapi kinhan tuwe wakişake kta okihi he ?
- 15 Wicacante wiyukcan kin he wosdonye ton kta, qa wicašta ksapa nogepi kin wosdonye akite kta.
- 16 Taku ituhan kin wicašta kiciyukan kta, qa wicašta tanka wicitokam hiyuye kta.
- 17 Waakinicapi en tuwe tokaheya wohdake cin he ihdaowotanna, tuka uman hi qa iwange kta.
- 18 Oeonna kin akinicapi kin anapte ça wicašta waşaka wicayukinukan.
- 19 Sunkakiciyapi akinicapi kin conkaške tiyopa onatakapi kin iyececa, qa otonwe suta ohiyapi tehika ešta sunkakiciyapi kicipajinpi kin he sanpa tehika.
- 20 Wicašta tezi kin taku i kin icahye cin on imna kta, taku iha kin etanhan inape cin heon imna kta.
- 21 Wiconęe wiconi ko wicaceji nape kin ohna un, qa tuwe he wašte dake cinhan taku icahye cin he etanhan yute kta.
- 22 Tuwe tawicu iyeye cinhan taku wašte iyeya, qa Jehowa wicašta kin he cante kiya.
- 23 Wicašta wahpanica wacekiya yanka, tuka tuwe wijice cin he sutaya waayupta.
- 24 Tuwe wicota kodawicaye cin he kodayapi iyecen ihdutanin kta, qa wanji wacantkiya sunkayapi wicapatan ešta sam iyeya wicapatan.

WICOWOYAKE 19.

- 1 Tuwe iha pemni qa witkotkoka hee śni, tuka tuwe ecetuya mani wahpanica ešta hee wašte.
- 2 Wicanagi kin wosdonye nice cin he nakun wašte śni, qa tuwe siha kin inahni kin he nuni.
- 3 Wicašta towitkotkoke cin canku kin hdupemni, qa cante kin Jehowa canniyeya.
- 4 Wowijice kodayapi ota icaħya, tuka tuwe wahpanica kin he takodaku yukinukan.
- 5 Wayaatanin itonśni kin he iyopeyapi kta, qa tuwe taku ecinkta enapeye cinhan ihduśpe kte śni.
- 6 Tuwe nina wo wicaqu kin wicota he ite kin kastostopi kta, qa tuwe ituħansa kin he owasin kodayapi kta.
- 7 Tuwe onśika eca hunkawanjitku owasin śice dakapi, qa hecen sam iyeya kodawicaya ihdutehanpi, wicoie pasi tuka hena taku śni.
- 8 Tuwe cante ton kin he nagi kin wašte kidaka, tuwe wookahnige patan kin taku wašte iyeye kta.
- 9 Wayaatanin itonśni kin iyopeyapi kta, qa tuwe taku ecinkta enapeye cinhan awihnuni kta.
- 10 Wicašta witkotko taku wiciyokipi yuhe kta he iyecece śni, qa ookiye yuhapi qon wicašta itancan wowidag wicaye kta e sanpa tehika.
- 11 Wicašta toksape kin tocanniye kin kihnaka, qa śicaya ecakiconpi kin iwankam iyaye cin towitan kin hee.
- 12 Wicašta yatapi tocanniye kin he mnaja hoton kin iyececa, qa toiyokipi kin cu kin wato akan he iyececa.
- 13 Hoksıdan witkotko atkuku toiyokiśice kin ee, qa winohinca kigesas kin śbuyapi ohinniyan kin heca.
- 14 Tipi qa woyuha hunkake yapi etanhan tawayapi, tuka tawicu ksape cin he Jehowa etanhan.
- 15 Wokuje kin he ħbapi kaga, qa wicanagi econkapin kin he wotektehda un kta.
- 16 Tuwe woope kin yuhe cinhan nagi kin hduha, qa tuwe tacanku kin iyakiktaśni kin he te kta.
- 17 Tuwe wahpanicapi cante wicakiye cin he Jehowa oqu, qa taku wašte kin he iyecen tanyan kicu kta.
- 18 Nahanhin taku wašte ape oyakihi nicinca iyopekiya wo, qa te yakiye kta ihnuhan ninagi en inape cin.
- 19 Tuwe wocanteptanye tanka kin he śitkiħdayapi kta, hetanhan edaku ešta ake ecanon kta.
- 20 Wahokonniciyapi kin awacin wo, hecen iyohakamya yaksape kta.

- 21 Wicacante ekta taku ota awacinpi, tuka Jehowa taku konze cin he sutaya he kta.
- 22 Wicašta toiyokipi towacantkiye kin hee, qa wicašta wahpanica kin wicašta itonśni kin kapeya.
- 23 Jehowa kokipapi kin on wiconi, qa tuwe hecon kin he imnahan yanke kta, taku śica he iyohi kte śni.
- 24 Wicašta kuje cin nape kin wakśica ohna yekiya, ake i kin ekta ešta hiyukiye kte śni.
- 25 Waoncesa nina ayape cinhan tuwe wacintonśni kin he ksape kta, qa wicašta wokahnige kin he iyopeya wo, wosdonye okahnige kta.
- 26 Hokśidan waištenya qa waihakta śni kin he atkuku kin hdutakuniśni, qa hunku napekiya.
- 27 Micinkśi woonspe kin wosdonye wicoie kin etanhan nuni wicakiye cin he nahon kta ayuŕtan wo.
- 28 Wayaatanin wicašta śni kin he woyaco ihaha, qa wicašta śica ipi kin taku śniśni napcapi.
- 29 Woyaco wicašta śica wiyeya wicakicihnakapi, qa wicašta witkotkopi tapetepi kapsinpsintapi kta.

WICOWOYAKE 20.

- 1 Miniśa kin he waihaha qa mini wakan kin he owodutaton wicaya ; tuwe unman tukte kašta on nuni kinhan ksape kte śni.
- 2 Wicašta yatapi kin yuśinyewicaye cin he mnaja hoton kin he iyececa, tuwe he canniyeye cinhan iye nagi kin awahtani.
- 3 Akinicapi anapte cin wicašta towitan kin ee, tuka wicašta witkotko otoiyohi wakigepi en yeiçiye kta.
- 4 Wicašta kuja osni kin on maga hdumdu kte śni, he on woksapi icunhan woda kta, tuka wanice kta.
- 5 Wicašta taku konze cin he cante mahen mini śma kin iyececa, tuka wicašta wookahnige kin he tankan hiyuye kta.
- 6 Wicašta ota otoiyohi towacantkiye kin ohdake kta, tuka wicašta wowicake tuwe iyeye kta he ?
- 7 Tuwe ecetuya mani kin he ohan owotanna, cinca iyohakam icagapi iś eya tanyan unpi ece.
- 8 Wicašta yatapi woyaco oiyotanke akan yanke cin he išta kin on taku śica owasin bomden iyaye ya.
- 9 Micante kin mihducedan, wawahtani kin etanhan mihduska, tuwe eye kta okihi he ?

- 10 Wiyutapi toktokeca, qa tke utapi toktokeca heniyozza Jehowa wahtedašni.
- 11 Koška ešta oħanye cin etanhan ihdutanin, oħan kin ecedan kinhan qa ecetu kinhan.
- 12 Noge wanaħon kin qa išta wawanyaka kin heniyozza Jehowa kaga.
- 13 Ihnuhan woistima wašte yadake cin, okini nihduwahpanice kta ; išta hdukawa hecen aguyapi inimna kta.
- 14 Šica, šica ce, tuwe opeton kta eye a wanna tawa tankan iyaya hehan ihdatan.
- 15 Mazaskazi yukan, qa tukihasan ša ota ešta, wosdonye wiciha kin he wojuha teħike hinca hee.
- 16 Tuwe oyate tokeca wicašta on, wecicajuju kta, eniciye cinhan tašina kin icu wo, qa tuwe wicašta sdonwicaye šni, wicawecicajuju kta, eye cinhan taku tohanyan kajuju šni duhe kte cin he icu wo.
- 17 Tokan wicakicicajupupi eyapi kin he aguyapi itonšni, qa iyohakam i kin isbudan oju ye kta.
- 18 Taku konzapi kin wiyukcanpi kin on yusutapi kta, qa tanyan iyukcanpi kin hehan ozuye kaga wo.
- 19 Tuwe waaia mani kin he taku nahmana oyakapi kin yaotanin, heon tuwe iha hdakawahan he kici icicahiye šni wo.
- 20 Tuwe atkuku hunku ko wicayašice cinhan otpaza cokaya kin petijanjan tawa kin bokicisni kta.
- 21 Woyuha otokahe ekta inahnina mnayanpi kin he owihanketa yawaštepi kte šni.
- 22 Taku šica toweon kta, ihnuhan ehe cin ; Jehowa apeya wo, iye niniye kta.
- 23 Nonpakiya tke utapi kin Jehowa wahteda šni, qa wohnaye aspekiyapi kin he wašte šni.
- 24 Wicašta oye kin he Jehowa etanhan, hecen tokiya tanhan wicašta canku kin hdukcan kta he ?
- 25 Wicašta tuwe ihnuhanna taku tawa hdawakan kin he hmug iiye, nakon tuwe konze cin iyohakan iwange cinhan.
- 26 Wicašta yatapi ksape cin he wicašta šica wicayamdece a canpahmihma wiciwankam hiyuya.
- 27 Jehowa petijanjan tawa kin wicašta taniya kin ee, taku wicacante mahentuya un kin owasin iwanyaka.
- 28 Wocantekiye wowicake ahna wicašta yatapi kin awanyakapi, qa oiyotanke tawa wocantekiye on hdusuta.
- 29 Koška towašakapi kin iwinktapi kin hee, qa wicahinca kin pa skapi kin

wowitan yapi.

30 Bahonpi paskitapi kin he taku síca patehan ya, qa apapi kin tezi cokaya iyohi kin he nakun.

WICOWOYAKE 21.

- 1 Jehowa wicašta yatapi cante kin mini wakpadan iyecen nape kin ohna yuhe ça toki cin kin heciya he yuptanyan.
- 2 Wicašta iyohi tacanku kin owasin ecetu kecin, tuka Jehowa wicacante owasin aspe kiya.
- 3 Wošnapi Jehowa iyokipi ešta taku owotanna qa ecetu econpi kin he isanpa iyokipi.
- 4 Íšta ihduwankantuyapi qa cante kin ihdatankapi kin hena wicašta síca petijanjan yapi tuka woáhtani.
- 5 Wicašta miniheca canteozepi on taku mnayanpi ece, tuka tona inahnipi kin owasin on ihdukakijapi ece.
- 6 Woyuha ota ceji itonśni on mnayanpi kin hena takuśniśni bomdu iyayapi, qa tona heconpi kin hena wiconęte akitapi.
- 7 Wicašta síca wakipi kin ihang wicaye kta, nakaś woyaco econ tawaęenyapi śni.
- 8 Wicašta canku pemnimni kin he oyate tokeca, tuka tuwe ecedan kin he tancanku kin ecetu.
- 9 Tice kahmin otipi kin hee wašte, tuka winohinca wakigesá kici tipi tankaya ešta otipi kin he tehika.
- 10 Wicašta síca nagi kin taku síca cin ece, íšta kin takodaku ešta wacantkiya yuze śni.
- 11 Waoncesa aonpapi kinhan tuwe wacintonśni ksape kta, qa wicašta ksapa onspe kiyapi kinhan wosdonye icu kta.
- 12 Wicašta owotanna kin wicašta síca toti kin iyukcan : Tuwe wicašta síca taku síca ohna napewicaya.
- 13 Tuwe tohan wicašta onśika hoyekiyapi ca noge kin onakitake cinhan ís eya hoyeye kta, tuka tuwedan ayupte kte śni.
- 14 Taku nahmana qupi kin he wocanniye anapte, ça itpi kin ohna taku ituhanpi kin he canteptanye tanka.
- 15 Woyaco econpi kin he tona owotanna iyuśkin wicakiya, tuka śicaya ohanyanpi kin wicakahintapi kta.
- 16 Wicašta wan wookahnige canku kin etanhan nuni kin he wicašta tapi yuwitayapi om yanke kta.
- 17 Tuwe iyokipi ięiye kta wašte dake cinhan ihduwahpanica, qa tuwe

miniša wihdi ko wašte dake cin he wijice kte šni.

18 Wicašta šica tona owotanna ohanyanpi kin wicakicicajujupi kta, qa wicašta wakisa kin tona ecetupi on.

19 Tinta hewoskantuya ounyanpi kin he wašte, tuka winohinca wakigesa qa wacanniyesa kici tipi kin he šica.

20 Wicašta ksapa ounye cin ohna woyuha wiciyokipi qa wihdi yukan, tuka wicašta witkotko kin he napca iyeya.

21 Tuwe woowotanna wocantekiye ohna ope cinhan wiconi woowotanna qa wowitan iyeye kta.

22 Wicašta ksape cin he wašakapi otonwepi kin ohiye ça, taku suta wacinyanpi kin he yuhukuya ece.

23 Tuwe i kin qa ceji kin awanhdake cin he nagi kin taku tehika etanhan kpatan.

24 Tuwe wahaničidayawocanniye kage cin he wamnaičida, wahaničida waoncesa eciyapi kta.

25 Wicašta kuja nape kin htani kapin, heon wocin kin țe kiye.

26 Anpetu osan wahduhaha kte cin cantotpani, tuka wicašta owotanna woqu qa tehinda šni.

27 Wicašta šica wošnapin kin he wowahtedašni ece, ecah taku šica awacinyan au kinhan isanpa.

28 Woitonšni wayaatanin kin awihnuni kta, tuka wicašta token nahon kin yatanin kin he ohinniyan ie kta.

29 Wicašta šice cin itohnake kin hdusuta, tuka wicašta owotanna kin canku kin hduacetu.

30 Jehowa itkokim wicoksape wanica, qa wookahnige wanice ça wokcan wanica ce.

31 Kicizapi anpetu kin heon šuktanka kin wiyeya kihnakapi, tuka niwicaye cin Jehowa hee.

WICOWOYAKE 22.

1 Woyuha ota hee šni, tuka tanyan caje niyatapi kin he kahniga wo ; mazaska mazaskazi kici hee šni, tuka tanyan wacin en niyuzapi kin.

2 Wicašta wijica qa wahpanica itkokicipapi, Jehowa napin wicakaga.

3 Wicašta ksape cin taku šice cin he wanyake ça inahma, tuka tona wacintonpi šni kin hena iyoptapi qa kakišwicayapi.

4 Jehowa kokipapi qa onšihan ičidapi iyuwin kin he wowitan qa wowijice qa wiconi.

5 Wicašta pemni tacanku kin ohna wapepeka on hmunkapi ko yukan,

tuwe nagi kin awanhdake cinhan hena ihdutehan kta.

6 Otokahe etanhan hoksidan tacanku kin ohna kihiya wo, hecen wicahinca ešta ehpekiye kte šni.

7 Wicašta wijica wahpanicipi wowidag wicaya, unkan tuwe waodote cin he waoqu kin he okiya ece.

8 Tuwe wicohan šica oju kin he wicotaninšni mnaye kta, qa tocanniye sagye kin sote kta.

9 Išta wacantkiya kin he yawaštepi kta, nakaš aguyapi tawa kin onšpa wakanheja wicaqu.

10 Waoncesa napeya wo, hecen wakigepi kin tokan ye kta, nakun waakincipi kicibapi ko enakiyapi kta.

11 Tuwe wicacante ecedan kin he wašte kidake cin he iha wiciyokipi on wicašta yatapi kin kodaye kta.

12 Jehowa išta kin wosdonye patan ece, qa wicašta wahnayesa oie kin yuptanyeya.

13 Mnaja wan tankan yanka, otonwe canku kin ohna makte kta, wicašta kuje cin eya.

14 Wihomniwin i kin he woħa šbe hinca, tona Jehowa wahte wicadašni kin hena ohinhpayapi kta.

15 Hoksidan cante kin ohna wopemni opahtapi ešta iyopekiyapi icapsinte kin he yutehan yekiciye kta.

16 Tuwe taku tawa hduota kta e wicašta onšika wicayuwahpanica, qa tuwe watonka wawicaqu kin he awicakehan wahpanice kta.

17 Nogoptan qa wicašta ksapa oiepi kin naħon wo, qa nicante kin mitoksape kin awacin kta.

18 Hena maku mahen yapatan kinhan wiciyokipi ; niiha kin akan yuecetupi kta.

19 Niš niye Jehowa wacinyaye kta, heon nakaha hena sdonye ciciya.

20 Wahokonkiciyapi qa wosdonye kin taku itancanyan ociciyake šni he ?

21 Hecen wowicake wicoie kin woecetu kin sdonye ciciye, heon tona ye nišipi kin hena wicoie wicake cin wicayakahdi kta.

22 Wicašta onšike cin he onšiya un kin on etanhan ihnuhan taku tawa yaki kinhan, qa wicašta wahpanice cin he wayacopi en yašuje šni wo ;

23 Awicanicipi en Jehowa iwicakiye kta, qa tuwe wawicaki kin he nagi kin ki kta.

24 Ihnuhan wicašta wacinko wan kodayaye cin, qa wicašta wacanniyesa kin kici ye šni wo ;

25 Okini oħan tawa kin ecewayakta nace, qa ninagi kin nicihmunkapi nun ce.

26 Tokan on taku wicakicicajujupi kta, icazopi kin wicakicicajujupi kta eyapi kin, ihnuhan owicayape cinhan ;

27 Taku on kajujupi oyakihi śni kinhan tokeca owinja nihuhuya tanhan eniciyakupi kta he ?

28 Maga wapetokeca wanakaja nihunkakepi ehdepi qon he dutokan kte śni.

29 Wicašta wohtani en miniheca wandaka he ? wicašta yatapi wicitokam najin kta ; wicašta caje wicayatapi śni kin hena wicitokam najin kte śni.

WICOWOYAKE 23.

1 Wicašta yatapi wanji kici wayate kta idotanke cinhan, taku nitokam he cin he en ewacin wo.

2 Wayate cin iyakape niye cinhan isan wan dote kin hdakinyan iniyakiye non ce.

3 Woyute tawa wiciyokipi kin he iyotan da śni wo, he woyute kin wicahnayan.

4 Wijinniçiye kta e ihdustute śni wo, wookahnige nitawa kin he ahduştan wo.

5 Taku en un śni kin he ekta išta kin yeyakiya he ? wanmdi wan mahpiya ektakiya kinyan iyaye cin he iyecen wowijice hupahu içicage ça iyaya ece.

6 Tuwe wohinyesa kin aguyapi tawa kin etanhan yute śni wo, qa woyute skuya tawa kin kon śni wo ;

7 Nakaş token nagi mahen ecin kin he iyececa, Wote ça wayatkan wo, eniciya ešta cante kin nici un śni.

8 Onşpa yate cin he hdemyaye kta, qa nioie wašte kin owasin ehpeyakiye kta.

9 Wicašta witkotkoka noge kin ohna ie śni wo, nioie woksape kin ihakta kte śni.

10 Maga wapetokcea wanakaja kin he dutokan kte śni, qa wamdenica maga tawapi kin en ye śni wo.

11 Nakaş tuwe taku wicaye cin he waşaka, iye hinca taku tawapi kin on nici akinice kta.

12 Woonspe ekta nicante kin hiyukiya wo, qa ninoge kin woksape wicoie kin ekta.

13 Hokşidan iyopekiyapi patan śni wo ; cansakadan on ayapa ešta te kte śni.

14 Cansakadan on ayape kta, hecen nagi kin Hades etanhan edaku kta.

15 Micinkşi nicante kin ksape cinhan micante kin iyuşkin kta, miye hinca ;

- 16 Qa pakśin mitawa nina pida kta, niiha taku ecetu eye cinhan.
- 17 Ihnuhan nicante wahtanisa icewicakin kin, tuka anpetu osan Jehowa kokipeyahan un wo.
- 18 Nakaś woyuśtan yuke cinhan taku wacinyan ayape kin he nicicaśpe kte śni.
- 19 Micinkśi niye anagoptan, qa ksapa wo ; qa canku ohna nicante kin hduowotanna wo.
- 20 Miniśa yatkanpisa qa iyokipi iĉiyapi kta e tado napcapisa owicape śni wo.
- 21 Witkosa qa wotesa kin hena ihduwahpanicapi, qa ogungapi kin hena wokoyake hdehdecahan koyakapi kta.
- 22 Niyate cinca nicage cin he nahon wo, qa nihun wakanka eśta ihnuhan ihayaktaśni kin.
- 23 Wowicake kin opeton wo, qa wiyopekiye śni wo, nakun woksape qa woonspe qa wookahnige.
- 24 Tuwe ohan owotanna kin he atkuku nina iyuśkin kta, qa tuwe hokśidan ksapa wan icahye cinhan he etanhan pida kta ;
- 25 Hecen niyate nihun kici iyuśkinpi kta, qa tuwe niton kin nina pida kta.
- 26 Cinś nicante kin maqu wo, qa canku mitawa kin he niiśta kin awanyaka nunwe.
- 27 Witkowiwin kin he makoħdoka temahentuya, qa wihomniwin kin he woħa cistiyedan ee ;
- 28 Awicakehan he wabotica iyecen wawihmunke ĉa wicaśta ehna wahtanipisa wicayuota.
- 29 Tuwe, Hehehe, eya he ? tuwe ceya he ? Tuwe kicikigepi yuha he ? tuwe woiyokiśice yuha he ? tuwe taku on etanhan taninśni apapi he ? iśta samyahan un kin he tuwe ?
- 30 Tona miniśa tehan opapi kin, tona miniśa icicahiyapi kin akin yapi kin hena.
- 31 Miniśa tohan śaiĉiye, tohan wiyatke ohna iśta kin hdutanin, wiciyokipiya kaduze cin hehan atonwe śni wo.
- 32 He iyohakam wamduśka iyecen wayaħtake kta, qa sinteħda wan iyecen wakiunniye kta.
- 33 Hehan niiśta kin winohinca tokeca wanwicayake kta, qa nicante kin taku pemnimni kin enapeye kta ;
- 34 Qa tuwe miniwanca cokaya kin iwanke cin he iyenicece kta, qa tuwe śina watopekiyapi ihupa inkpata wanke cin he iyenicece kta.
- 35 Makaśtakapi tuka mayazan śni, amapapi tuka weksuye śni, tohan wekta kinhan ake awakite kta, ehe kta.

WICOWOYAKE 24.

- 1 Wicašta síce cin icewicakin śni wo, qa owicayape kta cin śni wo.
- 2 Cantepi kin waboticapi awacinpi, qa ihapi kin waapaṭayapi kin ecedan cajeyatapi.
- 3 Woksape on tipi kagapi ece, qa wookahnige on sutaya he kta.
- 4 Wosdonye on wopiye owasin woyuha tehike ɕa wiciyokipi ojudan yapi kta.
- 5 Wicašta ksape cin he waśaka, qa wosdonye wicašta kin he tuwe waśake cin he kapeya.
- 6 Ozuye yakage cinhan wayupiya econ wo, qa wiyukcanpi ota on ohiyapi ece.
- 7 Woksape kin he tehanwankantuya un, hecen wicašta witkotko kin he iyohi śni, otonwe tiyopa kin ohna i kin hdukawa śni.
- 8 Tuwe taku śica econ wacin kinhan he wicohan śica itancan eciyapi kta.
- 9 Witkotkoka cante oze kin he woahṭani kin ee, qa waoncesa kin he wicašta wowaṭtedaśni yapi kta.
- 10 Iyokiśicapi anpetu kin en cante niwankadan kinhan nitowaśake kin cistinna kta.
- 11 Tona wiconṭe en yusdohan awicayapi, qa wicaktepi kta e kaktihanhanpi kin hena ewicayahdaku kta yakapin kinhan.
- 12 He sdonunyanpi śni, eha ešta, tuwe wicacante kin iyukcan kin he iyukcan kte śni he ? tuwe ninagi kin awanyake cin he sdonye kta, qa wicašta otoiyohi token ohanye cin he iyecen yuhekiye kta.
- 13 Cinś tuhmaga canhanpi kin he wašte heon yuta wo, qa canhunpute kin he nicaka ekta skuye kta ;
- 14 Woksape ninagi kin ekta hecece kta, tohan he iyeyaye cinhan iyuwin yuke kta, qa taku ayape kin heon niɕihnaye kte śni he sdonya wo.
- 15 Wicašta śica, ihnuhan wicašta owotanna ounye cin iwandake cin, qa tipi tawa kin awihnuniye śni wo.
- 16 Wicašta owotanna śakowin akihde hicanan ešta najin kta, tuka wicohan síce cin he taku śica oiḥpaye kta.
- 17 Toka niye cin hicahe cinhan ihnuhan iduśkin kin, qa naiɕipson ešta ihnuhan nicante kin iyokipi iɕiye cin ;
- 18 Okinni Jehowa he wanyake cinhan iyokipi kte śni, qa tocanniye kin he etanhan niye en aniyuhomni nun ce.
- 19 Wicašta śicapi išta ihnuhan iyonyake cin, qa wicohan síce cin he icekin śni wo ;

- 20 Nakaś wicaśta śica iyuwin yuhe kte śni, qa wicohan śicapi kin hena petijanjan wicakiyusnipi kta.
- 21 Cinś, Jehowa kokipeyahan un wo, wicaśta yatapi nakun ; qa tona taku toktokeca akitapi kin hena om opiiciye śni wo.
- 22 Heniyoza tohan kakiś wicayapí kta tuwe sdonya he ? woiyokiśicapi ihnuhanna anawicajin kta.
- 23 Wicaśta ksapa oiepi kin hena nakun eepi : Wayacopi kin en wicite iyekiyapi kin he wašte śni.
- 24 Tuwe wicaśta śice cin, oniwotanna eciye cin he oyate kin yaśicapi kta ; han, owasin wowahtedaśni yapi kta.
- 25 Tuka tona he iyopeyapi taku wiciyokipi iyeyapi kta, qa tuwe wašte kin wicayawašte kta.
- 26 Tuwe wicoie ecetu ayupte cinhan iha kin iputakapi kta.
- 27 Nitohtani tankan iwanhdaka wo, qa nitamaga kin tanyan hduśtan wo, qa hehan tipi yecage kta.
- 28 Ihnuhan ituñ nitakoda on taku śica odake cin ; niiha kin on wicayahnaye kta he ?
- 29 Token ecamiconpi kin he iyecen ecawecon kta, wicaśta otoiyoñi token ohanye cin he iyecen owakihanye kta, eye śni wo.
- 30 Wicaśta kuja wan tamaga kin icahda iyamdupta, qa wicaśta cante nica wan wiyuwi tawa ikiyedani ;
- 31 Unkan inyun hena owancaya haśbe aicage ça itohnake kin osan wapepeka on akahpetonpi, qa inyan on inataktonpi kin he yuwankapi ;
- 32 Hena awatonwan, qa micante kin ekta ewahnaka ; wanmdake ça waonspemiçiciye.
- 33 Ehake cistiyedan ništibe, cistiyedan makan inunke kta e nape pakśijapi ;
- 34 Hecen nitowañpanice kin he wicaśta icimani wan he iyecen en nihi kta, qa wicaśta wipe hduhe cin en u kin iyecen taku owasin inicakije kta.

WICOWOYAKE 25.

- 1 Wicoie wakan kin dena nakun Salomon tawa, qa Juda oyate wicaśta yatapi Hizekiya wicaśta tawa kin dena akta owapi.
- 2 Wakantanka taku anakihbe kta towitan kin ee, tuka taku tanyan iyukcan kta e wicaśta yatapi kin towitan kin hee.
- 3 Mañpiya tehanwankantuya kin, qa maka temahentuya kin, qa wicaśta yatapi cante kin hena owasin iyukcanpicaśni.
- 4 Mazaska etanhan gigi kin he yutokan iyeya wo, hecen wakśica wan

mazakage cin un kta e hiyu kta.

5 Wicašta yatapi itokapa tanhan wicohan śicapi kin hena wicayutokan wo, hecen oiyotanke tawa woowotanna on sutaya he kta.

6 Wicašta yatapi kin itokam ihdutan śni wo, qa wicašta tokapapi ohe kin ohna najin śni wo.

7 Nakaś, Wankantuya deciya u wo, eniciyapi kin hee wašte, tuka wicašta itancan niišta wanyake cin he itokam niyuhukuyapi kin hee wašte śni.

8 Ihnuhan inahniyan woakinice en yeniciye cin, okini owihanketa tuwe kici ayakinice cin he ištenniye kta, hehan token ecanon kta he ?

9 Tuwe kici ayakinice cin he kiciśnana wohdaka wo, unkan tokan taku nahmana oniciyake cin he yuotanin śni wo.

10 Okini tuwe nanihon kin he iyopeniye kta, qa ištenniyanpi kin niciyutokanpi kte śni.

11 Wicoie wan tohan iyececa iapi kin he taspan tanka zizi kin mazaska wakiśkotpa ohna he iyececa.

12 Wawiyopeye ksape cin noge wanaon kin ekta he mazaska oinpi kin, qa mazaskazi wanapin kin he iyececa.

13 Wahośi wacinyepica wan tona ye śipi kin iyowicakipi kin he, mdoketu cokaya wa osni kin iyecen, qa itancan tawa nagi kin ekicetu.

14 Tuwe taku wicaqu kta itonśniyan on ihdatan kin he mahpiya sapa qa tate magaju wanica kin he iyececa.

15 Wacintankapi on wicašta yatapi kin cinkiyapi, qa ceji skuya kin he wicahuhu kin yaksa ece.

16 Tuhmaga canhanpi iyeyaya he ? winipi kta e hecedan yuta wo. Okini iyatahdeniciye cinhan yahdepe kta.

17 Ihnuhan nisiha kin anpetu owasin nitakoda ti kin en ye yakiye cin ; okini ijehan en de cinhan śice nidake kta.

18 Tuwe takodaku oitonśniyan wayaatanin kin he wanhinkpe, qa isan qa canhpi wan iyececa.

19 Wohnaye wicašta wan, anpetu iyokiśicapi en wacinyanpi kin he hi wan ksahan qa siha pśunwahan kin he iyececa ece.

20 Tuwe cante śice cin he ekta wiyuśkinyan odowan ahiyayapi kin he anpetu sni icunhan heyake yuśdokapi kin, qa wipajaja miniskuya akaśtanpi kin he iyececa.

21 Tuwe śice nidake cin he wotektehda kinhan aguyapi yunkiya wo, qa ipuza kinhan mini yatkekiya wo ;

22 Hecen petaga iye pa kin akan mnayaye kta, unkan Jehowa iyuwin niçu kta.

23 Tate waziya tanhan u kin he magaju kaha iyeya, he iyecen itohnake

canksiya wicaceji taku síca nahmana oyake cin.

24 Tice okahmin otipi kin hee wašte, tuka winohinca wakigesá kici tipi tankaya ešta he tehika.

25 Wootanin wašte wan makoce tehantanhan aupi kin he mini sni tuwe ipuza kin ekta he iyececa.

26 Wicašta owotanna wan wicašta síca itokam patuje cin he mini owe omanipi kin, qa wakoniya waihang ye cin he iyececa.

27 Tuhmaga canhanpi ota yutapi kin he wašte sni, he iyecen taku tke owasin iyukcanpi kin he tehika.

28 Tuwe toniya hduhe kta okihi sni kin he otonwe wan kawankapi, qa conkaške wanica he iyececa.

WICOWOYAKE 26.

1 Mdoketu eca wa, qa woksapi icunhan magaju, he iyecen tuwe witkotkoka kinihanpi kin he wiciyokipi sni.

2 Zitkadan kinyanyan, qa icapšinpšincadan anawinyan kin, he iyecen ituň yašicapi kin he iyowicahi kte sni.

3 Šuktanka on wicapsinte, qa šonšonna on iiyuwi kin, qa wicašta witkotkopi tapetepi kin on cansakadan.

4 Ihnuhan wicašta witkotko towitkotkoke cin he iyecen adupte cin, okini niš eya he inihdacin kta.

5 Wicašta witkotko towitkotkoke cin he iyecen ayupta wo ; hecanon sni kinhan okini ksape içida kta.

6 Tuwe taku tanka on wicašta witkotko wahoši ye cin he siha kin kakse ça iye kiunniiçiye.

7 Wicoie wakan wan wicašta witkotko i kin ohna, tuwe hušte sicogan natitantan kin he iyececa.

8 Tuwe wicašta witkotko wan wowitan qu kin he inyan tehihika opahte wan inyan paha wan en ehpeye cin he iyececa.

9 Wicoie wakan witkotkoka ipi kin ohna qa wapepeka wan wicašta witko nape kin ohna hena iyececa.

10 Tuwe tanka kin he owasin yušinye wicaya, wicašta witkotko iyuwin qu, qa tona kapapi nakun iyuwin wicaqu ece.

11 Šunka taku hdepe cin he ake en hdi kin, he iyecen wicašta witkotko towitkotkoke cin ake econ ece.

12 Wicašta wan ksape içida wandaka he ? hee sni tuka wicašta witkotko kin hee ksape kta kecanni kta.

13 Inmutanka canku icahda yukan, otonwe canku kin ohna mnaja wan

yanka ce, wicašta kuje cin eya.

14 Tiyopa wan iyuze kin akan ihduhomnimni he iyecen wicašta kuje cin towinja kin akan ihduptanptan.

15 Wicašta kuja wakšica ohna nape kin ye kiya, ake i kin ekta hiyukiye kapin.

16 Wicašta kuje cin he wicašta šakowin wayupiya waayuptapi kin hena isanpa ksape içida.

17 Tuwe taku tawa šni akinicapi ahiyaye ça en ye içiye, he tuwe šunka noge kin yuze cin he iyececa.

18 Tuwe magaga içiye kta e petuspe wanhinkpe qa wiconęe kašo iyeye cin,

19 He iyecen wicašta takodaku hnaye ça, tokešta waškate šni he ? eye cinhan.

20 Can wanice cinhan peta kin sni kta, he iyecen woyakesa wanice cinhan kicigepi kin ayušanpi ece.

21 Caħdi petaga aonpapi, qa can peta akan, he iyecen wicašta wakigesa woakinice ideya ece.

22 Tuwe iwakan kin oie kin woyute skuya iyececa, qa wicatezi kin mahentuya iyaya ce.

23 Wiciha kata cante wahnaye kici mazaska icicahiyapi kin maka wakšica apawintapi kin he iyececa.

24 Tuwe šice dake cin he iha kin on ihdatokeca, qa iye mahentuya wohnaye kihnaka ;

25 Tohan ho kin wiciyokipi kaga he wacinye šni wo, hehan cante mahen taku wahtedapi šni šakowin yukan.

26 Wocanniye kin wohnaye on akaħpe, tohan šice cin he omniciye ohna yazamnipi kta.

27 Tuwe woħa wan qe cin he iye ohinħpaye kta, qa tuwe inyan wan paptanye cin he en icicawin hdi kta.

28 Wicaceji itonšni kin he tona wicayašuje cin šice wicadaka, qa wicai šdute cin wicotakuni šni kaga.

WICOWOYAKE 27.

1 Ihnuhan heyakecinhan on nihdatan kinhan, anpetu wan taku ton kta he sonyaye šni.

2 Nii kin hee kte šni, tuka tuwe tokeca niyatan nunwe, wicašta wan oyate tokeca, tuka niiha kin hee kte šni.

3 Inyan wan tke qa wiyaka kin he yušagwicaya, tuka wicašta witkotko tocanniye kin heniyoza isanpa tke.

4 Wocanniye he wohitika, qa wocanteptanye kin he minitan wan iyececa,

tuka wowinawizi itokam tuwe najin kta okihi he ?

5 Nahmana wašte dakapi kin hee šni, tuka taninyan iyopekiyapi kin hee wašte.

6 Kodayapi iyopewicaye cin he wicaka, tuka tuwe šicedake cin i iwicaputaka ešta wicahnayan.

7 Tuwe wipi kin he tuhmaga canhanpi ihakta šni, tuka tuwe wotektehda kin woyute pa ešta owasin skuye daka.

8 Wicašta oyanke tawa etanhan nuni kin he zitkadan wan hołpi kin etanhan nuni kin he iyececa.

9 Wihdi qa wizinyapi kin wicacante iyuškin kiya ; nakun takodaku nagi kin etanhan wahokonkiye cin oskuya.

10 Nitakoda qa niyate takodaku kin ayuštan šni wo, qa anpetu winicakije cin hehan nisunka ti kin en ye šni wo ; sunkayapi wan tehan yanke cin hee šni, tuka tuwe nikiyedani ti kin hee wašte.

11 Micinkši ksapa wo, hecen micante kin iyuškin kta, qa tuwe taku šica emakiye cin itkom taku ewakiye kta.

12 Wicašta ksape cin taku šica wanyake a inahma, tuka tona wacintonpi šni kin hena iyoptapi qa kakišwicayapi.

13 Tuwe oyate tokeca wicašta on wecicajuju kta, eniciye cinhan tašina kin icu wo ; qa tuwe wicašta sdonwicaye šni on wicawecicajuju kta, eye cinhan taku tohanyan kajuju šni duhe kte cin he icu wo.

14 Tuwe hanhanna hin kikta qa takodaku hotankakiya yawašte kinhan he yašicapi kiciyawapi kta.

15 Magaju anpetu icunhan ohinniyani ošbuyapi wan, qa winohinca wakigesani wan hena iakedececa ;

16 Tuwe he anakihbe cin he tate kin anahma he iyececa, qa nape etapa wihdi waštemna kin he ihdutanin kta.

17 Mazasapani on mazasapani pekiyapi, qa wicašta kin takodaku ite kin on pekiyapi.

18 Tuwe witanšna hu patan kinhan hetanhan waskuyeca yute kta, qa tuwe itancan awanhdake cin he yutanpi kta.

19 Mini ohnani ite wan ite kin iyececa, he iyecen wicacante kin wicašta kin iyececa.

20 Hades qa wiconęe kin imnapi šni, he iyecen wicišta kin imnani kte šni.

21 Mazaska maka wakšica on, qa mazaskazi maza ocetani on, qa wicašta kin wicai yatanpi kin on iyutapi.

22 Wicašta witkotkoni wan wibope ohnani wamnaheza kici wibope ihupani on boyapani ešta, towitkotkoke cin he ayuštan kte šni.

23 Tahinca nitawani kin token taninpi tanyan sdotkiyani wo, qa wanuyanpi

kin awakicin wo :

24 Nakaş woyuha kin he ohinniyan en un şni, qa wicaşta yatapi wicowazi wanjidan etanhan ohinniyan un kta he ?

25 Peji kin inanpa qa wato kin tanin, qa he peji kin he mnayanpi kta.

26 Tahinca ska kin etanhan wokoyake yaton kta, qa tatokadan wanuyanpi on maga wan opeyaton kta ;

27 Hecen tatokadan asanpi imna wayate kta, qa tiyohnaka nitawa nakun, qa he on wikoşka nitawa nipi kta.

WICOWOYAKE 28.

1 Wicaşta şica tuwedan wicakuwa şni ešta najicapi ece, tuka wicaşta owotanna mnaja iyecen waditakapi.

2 Makoce wokipajin kin on wicaşta yatapi ota, tuka wookahnige wosdone wicaşta wan eciyatanhan tehan ecetu kta.

3 Wicaşta wahpanica wan tona onşika wicayuwahpanice cin he magaju wakawankeya wan on woyute wanica he iyececa.

4 Tona woope opapi şni kin hena wicaşta şice cin yatanpi, tuka tona woope opapi kin hena wicakigepi ece.

5 Wicaşta şica woyaco okahnigapi şni, tuka Jehowa akitapi kin hena owasin okahnigapi ece.

6 Wicaşta wahpanica toecetu kin omani kin hee waşte, tuka tuwe canku kin hdupemni wijica ešta hee waşte şni.

7 Tuwe woope patan kin he hokşidan ksapa, tuka tuwe wotapisa kodawicaye cin he atkuku ištenya.

8 Tuwe woyahtake qa ota wicakida on woyuha kin hduota kin he tuwe wahpanicapi onşiwicada kte cin he on he mnaye kta.

9 Tuwe woope nahon kte şni e noqe kin hdutokan kin he wocekiye eye cin he wowahteda şni yapı kta.

10 Tuwe wicaşta ecetu kin canku şica onuni wicakiye cin he woşa wan iye qe cin he ohinhpaye kta, tuka tona ecetupi kin hena taku waşte tawayapi kta.

11 Wicaşta watonka kin ksape içida, tuka wicaşta wakahnige cin he iyukcan kta.

12 Wicaşta owotanna iyuşkinpi eca wowitan tanka ece, tuka wicaşta şica wankan ayapi eca wicaşta inahmanpi ece.

13 Tuwe wahtani kin ahdahpe cin he tanyan ihuni kte şni, tuka tuwe ohdake ça ayuştan kinhan onşidapi kta.

14 Tuwe ohinniyan kokipe cin he wowaşte wicaşta kin heca, tuka tuwe

cante kin hdusuta kin he taku síca ohinhpaye kta.

15 Wicašta yatapi síce cin he oyate onsíka akan he mnaja hdoya, qa mato waanatan wan he iyececa.

16 Wicašta yatapi wookahnige nice cin he taoyate kin nina wicayuwahpanica, tuka tuwe wicakipi síce dake cinhan anpetu tawa kin hduota kta.

17 Tuwe wicašta we kin on yusakapi kin he tuwedan yuze kte sni e woħa kin ekta inyanka.

18 Tuwe ecetu kiya mani kin he ni kta, tuka tuwe canku ota ohna ihdupemni kin he wanji ohinhpaye kta.

19 Tuwe tamaga kin kicanye cin he woyute imna kta, tuka tuwe tona takuska econpi owicape cin he wowicakakije on imna iħiye kta.

20 Wicašta wicake cin he wowašte ota, tuka tuwe ihduwijice kta e inahni kin he taku síca akipe kta.

21 Wicite iyekiyapi kin he wašte sni, wicašta hecon kin he aguyapi onspadan on wahtani kta.

22 Tuwe ihduwijice kta inahni kin he ísta síca, qa heon wowahpanice akipe kta sdotkiye sni.

23 Tuwe ceji skuye cin hee sni, tuka wicašta iyopeye cin hee iyohakam wašte dapi kta.

24 Tuwe atkuku qa hunku ešta taku tawa icu qa, taku síca ecamon sni, eye cin he waihangyesa dakonya.

25 Tuwe nagi tanka iħida kin he kicigepi kaga, tuka tuwe Jehowa wacinye cin he cepa aye kta.

26 Cante kin wacinkiyeye cin he witkotkoka, tuka tuwe woksape omani kin he ihduške kta.

27 Tuwe onsipike cin hena cante wicakiye cin he wicakije kte sni, tuka tuwe ísta anakihbe cin he wicota yašicapi kta.

28 Wicašta síca najinpi eca wicašta inahmanpi ece, tuka hena atakunipi sni eca wicašta owotanna ota ayapi ece.

WICOWOYAKE 29.

1 Wicašta ijehan iyopeyapi ešta tahu kin ihdusuta kin he ihnuhanna kašujapi kta, qa woasni wanice kta.

2 Tohan wicašta owotanna ota ayapi eca oyate kin wiyuškinpi kta, tuka wicašta síca widakapi eca oyate kin sícahowayapi ece.

3 Tuwe woksape wašte dake cin he atkuku iyuškinkiyeye kta, tuka tuwe witkowin om iyokipi iħiye cin tawoyuha kin toki ehpekiye kta.

- 4 Wicašta yatapi kin woyaco on makoce tawa kin sutaya he kiye kta, tuka tuwe mazaska qupi wašte dake cin he pawanke kta.
- 5 Tuwe takodaku on ceji kin hduskuye cin he siha kin on mazahtakiyapi wan eonpa.
- 6 Wicašta síca wahtani kin ohna mazhtakiyapi wan yukan, tuka wicašta owotanna wiyuśkin qa dowan kta.
- 7 Wicašta owotanna tona onśika wicayacopi kin sdonya, tuka wicašta síca he sdonye kta okahnige śni.
- 8 Wicašta waoncesa otonwe kin ideyapi, tuka wicašta ksapa wocanniye anaptapi ece.
- 9 Wicašta ksapa wan wicašta witkotko wahokonkiye cinhan, canksiya ia qa iha ešta iyozi wanice kta.
- 10 We wicašta kin hena tuwe wašte kin śicedakapi, qa wicašta ecetu nagi kin akitapi.
- 11 Wicašta witkotko tawacin kin ocowasin hiyuya, tuka wicašta ksape cin he tokata ekihnaka.
- 12 Wicašta yatapi wicoie itonśni anagoptan kinhan ookiye wicaye cin owasin śicapi kta.
- 13 Wicašta wakiyuśe qa wahpanica akicipapi, Jehowa napin íštapi kin iyoyam wicaya ece.
- 14 Wicašta yatapi tona onśika wowicake eciyatanhan wicayaco kinhan oiyotanke tawa kin owihanke wanin sutaya he kta.
- 15 Hokśidan kiyuśkapi kin he hunku íštenya, tuka icapsinte iyopekiyapi iyahna he ksapa kaga.
- 16 Wicašta síca ihduotapi eca wicohan síca nakun ota kta, tuka wicašta owotanna hena atakunipi śni kin atonwanpi kta.
- 17 Nicinkśi kin iyopekiya wo, hecen oziniçiye kte ça ninagi kin iyokipi kta.
- 18 Tukten Wakantanka oie kin wanice cinhan oyate kin wohitika, tuka woope yuhapi kin he wowašte oyate.
- 19 Wowidake wan wicoie on yuacetupi śni, okahniga ešta ayupte kte śni.
- 20 Wicašta ia ohanko wandake cinhan hee śni, tuka wicašta witkotko kin hee etanhan taku wašte ayape kta iyececa.
- 21 Tuwe tawowidake kin hokśiyopa ehantanhan kihna kinhan, owihanketa he cinca ye kta.
- 22 Wicašta wacinko kicigepi kin icahya, qa wocanniye wicašta kin woahntani ota.
- 23 Wicašta wamnaicida kin on ihdukuye kta, tuka tuwe woniya kucedan kin he wowitan ton kta.
- 24 Tuwe wamanusa kici wopamni yuhe cin he nagi kin śice kidaka,

yašicapi kin nahon tuka oyake šni.

25 Wicašta kokipapi kin he wicahmunka, tuka tuwe Jehowa wacinye cinhan okope wanin un kta.

26 Wicota wicašta yatapi ite kin akitapi, tuka wicašta wicayaco kin Jehowa hee.

27 Wicašta owotanna wicašta šice cin he wowahtedapi šni, qa wicašta šica tuwe ohan owotanna kin he wowahtedapi šni.

WICOWOYAKE 30.

1 Agur Jake cinhintku kin wicoie tawa, odowan wan, Itael eciya, Itael Yukal ko ewicakiya.

2 Woteca iyemaceca qa wicašta iyemacece šni, qa wicašta towiyukcan kin mayuke šni.

3 Awicakehan woksape kin onmaspe šni qa wicašta wakan wosdonye kin he sdonwaye šni.

4 Tuwe wankantuya Mašpiya ekta i he ? qa tuwe hetanhan kun hdi he ? Tuwe nape kin ohna tate kin mnayan he ? Tuwe mini kin šina wan ohna opahta he ? Tuwe maka ihanke kin owasin ehde he ? Token eciyapi qa cinhintku token eciyapi he ? sdonyaye cinhan oyaka wo.

5 Taku wakan oie kin owasin peta on yuecepidan ; tona he wacinyanpi kin hena wahacanka yapi.

6 Ihnuhan oie tawa kin ekta taku aokijuyaye cinhan, okini iyopeniye kta, qa iyatonšni iyeniyampi kta.

7 Taku nom cicida, maše šni ecen hena temicihda šni wo ;

8 Wicohan šica qa iapi ecinkta miciyutehan ye, wowahpanice wowijice unmanna maqu šni, woyute wate kta iyececa wonmayan ye ;

9 Okini wimapi kinhan mičihnaye ça, Jehowa he tuwe, epe kta ; qa wimakakije cinhan okini wamawanun, qa iwaton šni ešta taku wakan namahon epe kta.

10 Ihnuhan wowidake wan yuhe cin ekta ayakiia, okini niyašice kta qa taku šica ayakipe kta.

11 Wicoicage wan atkuku kin yašice ça hunku kin yawašte šni.

12 Wicoicage wan wakašotešni ičidapi, tuka unkce kin wicakiyujajapi šni.

13 Wicoicage wan išta hduwankanpi hinca, qa ištojuha wankan ayapi ece.

14 Wicoicage wan hipi kin canhipi kin iyececapi, qa hiskepi kin isan iyececapi ; hecen tona onšika maka etanhan temwicayapi, qa tona wahpanica wicašta ehna unpi kte šni.

- 15 Tusda cunwintku nonpa, napin, Maqu ye, maqu ye, eyapi. Taku yamni
imnapı ŝni, qa taku topa, Henakeca, eyapi ŝni ;
- 16 Hades, qa tamni cinca ton ŝni, qa maka kin mini imna ŝni, qa peta,
Henakeca, eye ŝni.
- 17 Wicaŝta wan atkuku ihaħa, qa hunku kin naħon kta e ihaktaŝni kin he
kaksiza kangı kin capapi kta, qa wanmdi cinca kin he yutapi kta.
- 18 Taku yamni yuŝinyemayan, qa taku topa owakaħnige ŝni ;
- 19 Wanmdi canku kin maħpiya ohna, wamduŝka canku kin imnija akan,
wata canku kin mde cokaya, qa wicaŝta canku kin wikoŝka kici.
- 20 Winohinca wawicıhaħapi econ canku tawa kin he iyececa, wota qa i kin
itpakinte ĉa, Taku ŝica ecamon ŝni ce, eya.
- 21 Taku yamni on maka kin ŝkanŝkan qa taku topa on oziıciye kta okıhi
ŝni.
- 22 Wowidake on tohan wicaŝta yatapi un ece, qa wicaŝta witkotko on
aguyapi imna wota ece ;
- 23 Winohinca canniyesa on hihna ton kinhan, qa wayakawin on yuhe
ciqon woyuha kin tawaye cinhan.
- 24 Taku topa maka akan iyotan cistinna tuka ksape ĥinca ;
- 25 Tajuŝka kin oyate waŝake ŝni tuka mdoketu eca woyute kihnakapi ece ;
- 26 Hitunkasan kin tancan sutapi ŝni, tuka imnija ohna tipi kicagapi ece ;
- 27 Arebe (psipsicadan ocaje wan) wicaŝta yatapi nicapi tuka obe tawapi
owasin yuwıtaya icımanipi ;
- 28 Onktomi napepi on yuzapi qa wicaŝta yatapi ti kin ohna yakonpi ece.
- 29 Taku yamni tanyan manipi ece, qa taku topa tanyan yapi ;
- 30 Mnaja kin he wamanica iyotan waŝake ĉa takudan etanhan ihduhomni
ŝni ;
- 31 ŝunka wakan nite ipiyag tonpi, qa tatokadan mdoka, qa wicaŝta yatapi
oyate tawa opapi kin he.
- 32 Witkotkoya nihduwankantuya kinhan, qa taku ŝica yakonze cinhan, nii
kin akan nape kin atputaka wo.
- 33 Awıcakehan pte asanpi kin icıcahiyapi kinhan pte asanpi ihdi kin hiyu
kta, qa wıcapoge yutitanpi kinhan we hiyu kta, qa wocanniye yutitanpi on
kicıgepi hiyu kta.

WICOWOYAKE 31.

- 1 Lemuel wicaŝta yatapi wıcoie tawa, odowan hunku kin he onspekiye
cin dee.
- 2 Cınŝ taku hwo ? mitamni cinca kin taku eciye kta he ? womıciyake ota

eciyatanhan citon kin taku hwo ?

3 Ihnuhan nitowaśake kin he winohinca yaqu kin, qa canku nitawa taku wicaśta yatapi ihang wicaye cin ekta ye yakiye cin.

4 Wicaśta yatapi, Lemuel, wicaśta yatapi miniśa yatkanpi kta he iyecece śni, qa wicaśta yatapi cincapi kin mini wakan cinpi kta he iyecece śni.

5 Okini he yatke cinhan taku konzapi kin akiktonje kta, qa wicaśta onśika tawoyaco kin yaśkiśke kta.

6 Tuwe wanna ƣe kte cin he mini wakan kin qu wo, qa tona cante śicapi kin hena miniśa wicaqu wo.

7 Hecen yatke kta, qa tokakije cin akiktonje kta, qa toiyokiśice cin icimanna kiksuye kte śni.

8 Iapi okitpani kin he on i kin hdukawa wo, qa wamdenica owasin wicayacopi kinhan ;

9 I kin hdukawa qa tona onśika qa wicakijapi owasin iwicakiya owotanna wayaco wo.

10 Tuwe winohinca ksapa wanji iyeye kta he ? Tukiha tehihika ee kaeś sam iyeya iyawapi.

11 Hihnaku cante kin he wacinkiya, qa woyuha icakije kte śni yan un kta.

12 Tohan ni kin hehanyan taku waśte ecakicon kta, qa taku śica wanice kta.

13 Tahinca hin hahonta on kagapi ko akita, qa nape kin iyokipi ya htani.

14 Wopeton witawata tawapi kin iyececa, tehantanhan woyute tawa kin en ihdoku.

15 Nahanhin anpa śni kikta, qa tiyohnaka tawa owasin woyute wicaqu, qa wikośka taku econpi kta sdonye wicakiya.

16 Maga wan awacin qa opeton, taku nape kin kagapi kin on hastanhanka iyuwi wan huhde.

17 Ipiyaka sutaya iyahdaśka qa hupahu kin hduwaśaka.

18 Taku wiyopeye cin he waśte e sdonkiye ; hanyetu osan petijanjan hde kin kicisni śni.

19 Wipahmu kin ekta nape yekiya qa napsukaza kin iyuhmu kin yuza.

20 Tona onśika kin hena on nape kin hdugata, qa wicaśta oncikpani owicakiye kta e nape kin ye kiya.

21 Wapa keś tiyohnaka tawa kin on ikope śni ; nakaś owasin taku icitakhna ece koyakapi.

22 Owinja ićicaga ; qa minihuka zibzipedan śinaśa ko koyaka ece.

23 Otonwe tiyopa kin ekta makoce hunkayapi wicehna hihnaku iyotanka eca iyekiyapi ece.

24 Minihuha zibzipedan kage ƣa wiyopekiye, ipiyaka nakun qa wopeton

kin wicaqu.

25 Wowasake wowitan iyahna ihduze ça tokata anpetu u kte cin iha.

26 I kin hdukawa eca wicoksape ia, qa ceji kin wacantkiya woope yuha.

27 Tiyohnaka tawa ohanyanpi kin owasin iwanyaka, qa kujahan aguyapi kin hdute sni.

28 Cinca kin najinpi eca hdawaštepi ; hihnaku nakun qa hdatan.

29 Cunwintkupi ota ksamya ohanyanpi, tuka niye owasin kape wicayaya ce, eya.

30 Wowiciyokipi kin he wicahnayan qa wicite wašte kin he ptenyedat, tuka winohinca Jehowa kokipeyahan un kin he yawaštepi kta.

31 Nape kin taku icahye cin he qupo, qa otonwe tiyopa kin ohna iye ohan kin hena yatanpi nunwe.